

नवाइ संक्रान्ति

त

नवाइ ज्ञान




सफू : नेवाः संस्कृति व नेवाः दर्शन

च्वमि : बलदेव जुजु

पिकाक : लोक साहित्य परिषद्, यल

पिदंगु दँ : ने.सं. १११५

मू :



पञ्चतत्त्वया शरीर त्वःताः

द्यः जूम्ह मां अमरवाणीयात

द्यछाया

-चवन्नि

गौरी-अनन्त कोष

न्ह्यबुँ

नेपाः अधिराज्य दुने थी थी मांभाय् व थी थी थितिरीति संस्कृति दुपि थी थी जाति जनजातिया समुदायस परम्परागत रूपं लोक मान्यता प्राप्त जुयावयाच्वंगु थःथःपिनिगु लोक संस्कृति, लोक साहित्य ब्वल्हना च्वंगु दु । अथे नं आपल थुजोगु लोक संस्कृति, लोक साहित्य हाःनाः मदुथे जुयाः उखेला थुखेला लानाच्वंगु जुल । थुजोगु लोक संस्कृतिस सांस्कृतिक मूल्य व लोक साहित्यया विशेषतायागु अध्ययन, अन्वेषण व अनुसन्धानया क्रम न्ह्याके जक फःसां नेपाःदेयागु सांस्कृतिक विविधताय् सांस्कृतिक समन्वय व सहिष्णुताया माध्यमं राष्ट्रिय भावना व एकता बःलानाः नेपाःदेयागु मंकाःगु राष्ट्रिय संस्कृति ब्वल्हनिगु, लोक साहित्यया धूकू भय्भय् बियाः च्वन्ह्याइगु । थुकियात हे वाः चायेकाः तथा फुगुचाःगु तिबः ब्रिडित लोक साहित्य परिषद्यागु नं जन्म जूगु खः ।

अले लोक साहित्य परिषदं न्ह्याकावयाच्वंगु ज्याङ्त्रःयात ग्वाहालि जुइकथं हे यल (ललितपुर) या घाँय्ब्व, कुलिह्लात्वाः निवासी (थौंकन्हे यल पूच्वः निवासी) लोक संस्कृति व लोक साहित्यप्रेमी तथा पारखी जुयादीम्ह भाजु विष्णुप्रसाद श्रेष्ठजुं मदयावनेधुंकूपि प्रातःस्मरणीय हने-बहम्ह मां गौरी व हनेबहम्ह अबुजु अनन्तप्रसाद श्रेष्ठजुपिनिगु दिवंगत आत्मायात सदां चिर शान्ति प्राप्त जुया च्वनेमा धइगु भिकामना यासे मां-बौया नामं हे “गौरी-अनन्त” नांगु छगू अक्षय कोष नीस्वनाः लोक साहित्य परिषद्यात धर्मचित्त भावं लःल्हानाछूगु जुल ।

थुगु गौरी-अनन्त कोषया मू तातुना

- (१) लोक संस्कृति तथा लोक साहित्य त्रिषयक च्वन्ह्याःगु कृति पिकाःपि अथे हे थुगु ख्यलय् च्वछायेबहगु योगदान बियावयाच्चपि अन्वेषक, विद्वान् व लोक संस्कृति, लोक साहित्यप्रेमी महानुभावपिन्त सिरपाः लःल्हाना हनेगु । थुगु सिरपाः संघ संस्थायात् नं वनेफु ।
- (२) लोक संस्कृति तथा लोक साहित्य विषयवस्तुस च्वयातःगु (पिमथंनिगु शोधपूर्ण कृति) पिथना बियाः च्वमियातनतुं पिथनागु सफू “गौरी-अनन्त सिरपाः” स्वरूप ससम्मान लःल्हायेगु ।
- (३) लोक संस्कृति तथा लोक साहित्य विषयस शोधकार्य याइपि शोधकार्यकर्तातय्त “गौरी-अनन्त सिरपाः” अन्तर्गत एकमुष्ट विद्वत्त्वृत्ति बिइगु ।

पिका:पाखें

आदिकालनिसँ नेपा: गालय् (स्वनिगलय्) बसोबास यानावया-
चवंपि नेवा: जातिया पुर्खाजनपिन्सं थःपिनिगु सभ्यता (Civilization)
व संस्कृति (Culture) गथे याना ब्वल्हंकल जुइ धका: सुनानं छक:
बिचा: यानास्वत धा:सा, छखे इमिसं कँगालं कँ कया: बूँज्या याये
सयेकूगु अले छेँ, सतः, चपाः, देगः, बाहा: बही दयेके सयेकूगु, थाज्या
याये सयेकूग् सभ्यताया विकास क्रम खनेदया चवंसा, मेखे इमिसं अनेक
चिन्तन मननया क्रम न्ह्याका: छ्वासय् पि वायेगु, सीवस: वांछ्बयेकेगु,
कल: वायेगु, बौ तयेगु निसँ खेलु मत च्याका: मन्द: पुज्यायेगु, ताहा-
का: जजंका ववखाना: खेँ सगं कया: ह्यपूजा यायेगु क्रमतक नं न्ह्याका
वयाचवंगु जुल । अले थुजोगु हे सभ्यता व संस्कृतिनाप स्वापू दुगु थी थी
नख: चख: जात्रा पर्व उत्सव नं इमिसं भः भः धाय्क हनावयाचवंगु
जुल ।

चव्य न्ह्यथनागु थुजोगु हे विषयवस्तुया लिधंसाय् दुवाला: विद्वान्
प्रा. बलदेव जुजुं थुग् बःचाधंगु सफू चवया बिज्या:गु जुयाचवन । थुकी
चवमि नेवा: जातियागु सांस्कृतिक बिशेषता व उकी दुने सुलाचवंगु
दार्शनिक पक्षयात उलावयेनेगु कुतः या:गु दु । थव छगू चवछायेबहगु
मालेज्या ख: धका: जिमिसं भा:पिया ।

थुजोगु अमूल्यगु सफू गौरी-अनन्त कोष अन्तर्गत पिथना: विद्वान्
प्रा. बलदेव जुजुयात ससम्मान हना: “गौरी-अनन्त सिरपा:” स्वरूप
थथे पिथनागु फुक सफू लोक साहित्य परिषद्पाखें लःल्हायेखना: जिपि
अतिकं गौरवान्वित जुइखन ।

चव्य न्ह्यथनातयागु विषयवस्तुस थथेहेतुं मेमेगु पिथनेबहगु शोध-
कृति नं प्राप्त जुल धा:सा जिमिसं बलुंबलुं उजोगु कृति पिथनेगु कुतः
यानाव चवने ।

विजयरत्न बज्राचार्य

यल (ललितपुर)

छ्याञ्जे

ने. सं ११११ गुन्हु पुन्ही

लोक साहित्य परिषद्

न्ह्यखँ

मनूतय्गु जीवनय् संस्कृतिया गुलि आवश्यकता दु धयागु खँ थन धयाच्वनेमाःगु मदु । अथे जूसां संस्कृतिया अर्थ व अभिप्राय मथ्इकं अन्धविश्वासया रूपय् हनावना च्वनेगु नं ला बांला जुइमखु । अले संस्कृति धकाः कय्च्यानाः हनाच्वनेगु हे छाया धयागु न्ह्यसः भीगु न्ह्यःने दं वइ । अथे जूगुलि भीसं आजुपिनिगु पालनिसं हनावया च्वनागु संस्कृतिइ दुने छु अभिप्राय दु, नापं गुज्वःगु दार्शनिक सिद्धान्त दुसुलाच्वंगु दु धकाः मालास्वयेगु तःसकं मयासं मगाःगु ज्या खः धयागुली मुयां विरोध अवश्य दइमखु जुइ ।

उकीसं थौंन्है मेमेगु संस्कृतित नं भीथाय् देशय् दुहां वयाः भीगु नेवाःसंस्कृतिइ त्वाकज्यानाः संस्कृतिया स्वरूप हे स्यनीगु स्थिति खनेदया वयाच्वन । पश्चिमी सभ्यतां कयाः भीथाय् न्ह्यागु सांस्कृतिक ज्याय् नं तमासा क्यनेगु है अप्वया वनाच्वंगु दु । गनं भवय्जक वन धाःसा अन भवय् नकेगु व भवय् नयेगु पहः हे गथे गथे जुइधुंकल । थुगु-कथं संस्कृतिइ विकृति पिहां वयाः भीगु समाज हे इवाकलय् दुनावती थे खनेदया च्वंगु सकलें नेवाःतय् लागि चिन्ताया खं खः । उकिं भीगु संस्कृति छु खः, थुकी गुज्वःगु दार्शनिक अभिप्राय दु ? धकाः भीसं सीकेगु साप हे आवश्यक जुयाच्वंगु दु ।

थ्व सफुली भीगु नेवाः संस्कृति गुज्वःगु दर्शनया आधारय् छ्यलेगु यानातःगु खः धकाः चर्चा यायेत कुतः यानागु दु ।

नेपाल संबत् १११२ यँलागा तृतीयाकुन्हु जिमि मां मन्त । मां बौ मदइबले दच्छितक्क बखि च्वनेगु धिति दुगुलि जि नं बखि च्वना । उब्ले हे लाक्क जिगु मतिइ छु लुल धाःसा मदुम्ह मांया लुमन्तिइ छगू

सफू च्वये दुसा जिउ । अले जि दच्छिया दुने नेवाःसंस्कृतिया बारय् छगू
सफू च्व हे च्वये धकाः क्वःछिना ।

छखें जिगु मनय् मांया नामय् छुं ज्या पूर्वके दइगुलि सन्तोष दइगुया
नापं मेखे नेपालभाषा व नेवाःसंस्कृतिया ख्यलय् छगू चिकीचाधंग् जूसां
तँसा तने दइगु जूगुलि नुगलय् उत्साह ब्वलना वल । अले थःत लाः
लाःगु इले च्वसा न्ह्याकु न्ह्याकु वना ।

जि आपाः धयाथें भीसं संस्कृतिया रूपय् व्यवहारय् छ्यलावया
च्वनागु खँयात हे क्वथीक स्वयाः उकियात हे प्रमाण तायेकाः उकिया
आधारय् दार्शनिक खँत न्ह्यब्वयेगु याना । पुराण, धर्मशास्त्र, तन्त्र-
शास्त्रतय्गु बः काः वनेबले गुलिखे भीगु संस्कृतिया खँत उगु शास्त्रत-
लिसे पाय्छि मज्जुगु खनेदु, जबर्जस्ति पाय्छि हे यायेत कुतः याना-
स्वयेबले भीगु संस्कृति धयागु फुक्क हे भारतीय संस्कृतिदुने लाःगु
जू वनाः भीगु धयागु छुं हे मदुगु जू वनीगु जूल । उकि लिखित ग्रन्थ-
तय्गु गनं उल्लेख याये मफुत । भीसं याना वयाच्वनागु व्यवहार हे
प्रमाण तायेकागु खः । ख नं खः, व्यवहार धयागु परम्परागत जूगुलि
प्रत्यक्ष प्रमाण खः ।

अनंलि मेगु छता खँ नं छु दु धाःसा भी नेवाःतय्गु विश्वय् हे
सुलिसे ज्वःमलाःगु बिस्कं हे दर्शन दु नापं उकिया आधारय् छ्यलावया
च्वनागु बिस्कं हे संस्कृति दु धकाः कयनेगुली हे भीगु गौरव दइ, अःखः
भीगु संस्कृति फुक्क भारतीय पुराण, धर्मशास्त्र, तन्त्रशास्त्रया आधारय्
छ्यलातःगु धायेगुली भीगु न्ह्याय् च्वनीमख् । भीगु संस्कृतिइ खनेदुगु
थःगु हे बिस्कं पहः अले बिस्कं सिद्धान्त दयेक दयेकं विभिन्न शास्त्रतय्गु
सिलः न्ह्यब्वयाः व्याख्या यायेगुलि अर्थया अनर्थ हे नं जुइफु, थ्व खँ
भीसं त्वःमंके मजिऊ ।

उकि थ्व हे नुगलय् तयाः भीगु सांस्कृतिक व्यवहारतय्गु अध्ययन
अनुसन्धान यानाः लुइके फुगु खँया बः कयाः नेवाः दर्शनया थी थी
पक्षत थ्व सफुली न्ह्यब्वयेगु कुतः यानागु खः ।

थ्व सफू पूर्वकेत इलेबेले छु गथे धकाः कुत्तकुलाः न्यनाः घ्वात्तु

ध्वानाः ग्वाहालि यानादीपि पासापिनिगु गून तःधंगु दुगु जि तायेका ।
 पासापि सुरेन्द्रमान श्रेष्ठ, इन्द्र माली अथे हे मल्ल के सुन्दरपिनिगु
 प्रेरणा जिगु लागी गुब्ने लवःमके मफइकथं जूल । वय्कःपिन्त दुनुगलं-
 निसें सुभाय् बिया च्वना । अनलि सफू पिथनेत माःगु सकताया भाला
 कयाः 'लोकसाहित्य परिषद्'पाखें ग्वाहालि यानादीपि परिषद्या दुजः
 पासापित व विशेष यानाः जितः साप माया यानादीम्ह सत्यमोहन
 दाइयात ला न्ह्याक्व सुभाय् च्छाःसां गाइमखु । सफूया चवःया लागी
 डिजाइन दयेका बियाः ग्वाहालि याःम्ह किजा जीवन राजोपाध्याययात्र नं
 दुनुगलनिसें मतिनाया नापं यक्व सुभाय् दु । अथे हे संकटा प्रेसया पासा-
 पिसं नं तःसकं च्यूताः कयाः माःमाःगु सल्लाह नापं बियाः सफू थायेगु
 ज्या पूर्वका बिउगुलि वय्कःपित यक्व यक्व सुभाय् च्छाया च्वना ।

सफुली जि ध्वाथुइक गुलितक खँत न्ह्यब्वये फत धयागु खँ ब्वमि-
 पिसं सफू ब्वनाः तिनि धाये फइ । छुं मचाः मगाःगु खँत बाय् पाय्छि हे
 मज्जुगु खँत नं दयाच्वंगु दुसा पतिनं सुयाः कयनादिल धाःसा उज्वःपि
 ब्वमिपि प्रति सुभाय् च्छायाः थःगु द्रंगुयात सुधार यायेत कुतः याये ।

सुभाय् !

चत्रमि



धलः

१. संस्कृति व दर्शन	१
२. नेवाः दर्शनया सिद्धान्त	३
३. नेवाः संस्कृतिया ऐतिहासिकता	६
४. नेवाः दर्शनया विशेषता	१०
५. छःपुजाया दार्शनिकता	१७
६. मन्त्रः विज्ञासः छः	२०
७. मनू सिनावनाः नं छः जुइगु धारणा	२५
८. वस्तुछःया रूपय् छेँ छः	२७
९. नेवाःतय् दैनिक जीवनय् संस्कृति	३१
१०. नखःचखः हनेगुया अभिप्राय	३५
११. नेवाः संस्कृतिया किंवदन्तीइ दार्शनिक पक्ष	४०
१२. नेवाः संस्कार व इहिपाःया विधि	४५

१. संस्कृति व दर्शन

मनू जुयाः जन्म कासैलि जीवनय् छुं महत्त्वपूर्णगु लक्ष्य प्राप्त यानाः धःगु जीवन सफल यायेत कुतः अवश्य यायेमाः, खान्नि मृत्युयात पियाः म्वायेगुया लागी जक म्वायेत स्वयेगु खःसा अथवा जीवनय् मखुगु कर्म यानाः हाकुगु किचल किकाः म्वाना च्वने माःसा ला भीगु जीवन अर्थे हे सित्तिकं फुना वनीगु जक मखसे सीधुंकाः तवक नं मभिगु व बांमलाःगु खँया उदाहरण जुयाः च्वनेमाली । थथे जीवनयात सित्ति फुकेगु भी मनूतय् लागी त्वःगु खँ गुळ्ने हे जुइमखु । अर्थे जूगुलि मनू जूसैलि भिं मनू जुयाः म्वाये सयेकेमाः, सभ्यता व संस्कृति ज्वाला ज्वाला थीगु जीवन जुइकाः म्वायेगु हे जीवनया सफलता खः ।

जीवनया लक्ष्य गुज्वःगु जुइमाः धायेबले थथे हे धकाः छक्कलं क्वःछीगु धाःसा अ.पु मजू । जीवनया लक्ष्यया बारय् विश्वय् यक्व सिद्धान्त त पिहां वयाच्चंगु दु, गुकियात थी थी दर्शनया नामं प्रचारय् वयाच्चंगु दु । उज्वःगु दार्शनिक सिद्धान्तं मनूतय् जीवन गुगुकथं न्ह्याका यंकेमाः धकाः लँ वयना च्वनी । व हे लँयात बाय् जीवन-पद्धतियात संस्कृति धायेगु यानातल । उकि छु खँ सीदत धाःसा संस्कृति धायेमात्रं हे उकिइ दर्शन दये हे माः । दार्शनिक अभिप्राय मदुगु संस्कृति संस्कृति मनुसे अन्धविश्वास जक जुई । नेपालय् च्वंपि नेवाःतय्गु संस्कृतिइ नं तःसकं महत्वं जायाच्चंगु दर्शन दु, गुगुलि भीत बांलाःगु जीवन हनेत लँ वयना च्वंगु दु ।

नेपाः छगू थुज्वःगु देखः, गुगु भौगोलिक दृष्टिकोणं चिकीचा धंसां थन विश्वय् हे सुलिसे ज्वःमलाःगु बिस्कं हे संस्कृति कय् च्यानाः जीवन हनाच्चंपि नेवाःत दु नापं इमि बिस्कं हे दर्शन नं दु । खय्तला

थन भारतपाखें इलेब्बले दुहां वया च्वपि मनूतय्सं उखेयागु हे संस्कृति
नं ज्वनावयाः छ्यलाच्वंगु नं सलंसः दै दयेधुकूगुलि भारतीय संस्कृतियात
हे नेपाः देयागु संस्कृति धाइपि नं थन यक्व हे दयेधुकूगु दु । थकि
यानाः थनयागु मौलिक संस्कृतिइ नापं प्रभाव लानाः त्वाकज्यानाः
छगू थें हे च्वनाः यक्व सःसिउ धाःपित थ्यंकं भ्रम जुयाच्वंगु दु । वास्त-
वय् थज्वःगु भ्रमयात चीकाः वास्तविकता छ्खः घयागु भी सकल
नेपाःमिपिसं बाय् कमसे कम फुक्क नेवाःतय्सं सीके व थुइकेगु तःसकं हे
आवश्यक जुयाच्वंगु दु । थुकि नेपाःमिपितिगु व नेपाःदेयागु हे गौरव
विश्वया मिखाय् च्वन्ह्याइ ।

५

२. नेवा दर्शनया सिद्धान्त

गुगुं नं दर्शनया मूल लक्ष्य छगू दइ, गुगु लक्ष्य प्राप्त यायेया लागि लैपुन दर्शनं व्याख्या यानाः क्यना चवनी । भारतीय आस्तिक दर्शनया मूल अन्तिम लक्ष्य मोक्षप्राप्ति खः । मोक्ष धयागु थुज्वःगु अवस्थाय् थ्यनीगु खः कि मनूया थ्व संसारलिसे सदांया लागि हे स्वापू तनावनाः याकःचा आत्माया रूपय् जक अस्तित्व ल्यनाचवनीगु खः । अथे जुयाः हे छखलः दार्शनिक तय्सं (सांख्य दर्शनया सिद्धान्तकथं) मोक्षयात कैवल्य प्राप्ति धकाः धायेगु यानाचवंग दु । कैवल्य धयागु प्रकृतिया पाखें ब्यालं चवनाः याकःचा जुइगु खः । मोक्ष जुल धायेवं संसारया मुख दुःखं थी फइमख् धयागु धारणा दु । व हे मोक्ष प्राप्ति यायेगु लक्ष्यय् थ्यकेत गुज्वःगु लैय् भीमं जीवन न्ह्याकेमाः धकाः पुराण, धर्मशास्त्र, तन्त्र-शास्त्रय् थीथी खँ त दर्शन यानातःगु दु । उकियागु लिधंसाय् हे भारतीय संस्कृतियागु निर्माण जुयाचवंगु खः । अथे जूगुलि भारतीय संस्कृति कथं गुलि नं धर्म कर्म जुयाचवनी, उकियागु ताः मोक्षप्राप्ति हे खः । छगू हे जन्मय् याये मफुमां मेमेगु जन्मजन्मान्तरय् वनाः छन्हु मोक्ष प्राप्त याये फइ धयागु धारणा भारतीय आस्तिक दर्शनय् दु ।

भीथाय्यागु नेवाः संस्कृति कथंयागु दर्शनया लक्ष्य मोक्षप्राप्ति मखसे देवत्व प्राप्ति अर्थात् मनू छः ज्यावनेगु खः । अथे जूगुलि थन-यागु संस्कृतिया दर्शन, अले थनयागु तान्त्रिकता सुलिसे ज्वः मलानाः थःगु हे मौलिक पहलं जाःगु बिस्कं हे जुयाचवंगु दु, थ्व थनया विशेषता खः ।

भारतयागु आध्यात्मिक दर्शनया प्रवर्तक व ज्ञातात व्यास, कपिल, पतञ्जलि थि ज्याःपि ऋषिमुनिपिसं आत्मचिन्तन यानाः अनेक कठोर

तपस्या त यानाः न इपि द्यः जुया वनेमफु, सायद मोक्ष प्राप्त यानावन
जुइ, पुराणय् स्वयेबले अथे हे खने दु । उज्वःपि ऋषिमुनिपित तःधपि
ज्ञानी महात्मात धकाः श्रद्धा यानाः सकसिनं थौतवकं माने याःसां द्यः
धकाः हे भाःपियाः पुजाकृथि इमिगु मूर्ति बाय् छुं प्रतीक वस्तु तथाः
न्ही न्ही पूज्याना तःगु गनं मदु । थुकियागु मतलब खः इपि द्यः जुया-
वपि मखु, ज्ञानी महात्मात धकाः नां जाःपि जक खः ।

भीथाय् धाःसा गुलि तान्त्रिकतय् द्यः जुयाः सिद्ध जुयावपि धकाः
सलंसः दनिसं न्ही न्ही पुजा यानाः इले ब्यले जात्रा नापं यानाः नखः हे
हनाः नेपाःमिपिसं माने यानातःगु दु । फंपियाम्ह तान्त्रिक जु पुचलि
द्यः जुयावंगु, अथे हे कंग, लूमरि, लुति अजिमा द्यः जुयावपि तान्त्रिक
म्ह्याय्मस्त व मखं छैया द्यः बाज्याया म्ह्याय् बिज्यासःद्यः जुयावंगु
खँतय्सं थनयागु संस्कृतिया सिद्धान्त मनूत द्यः जुयावनेगु खः धकाः
प्रमाणित यानाच्चंगु दु ।

मोक्ष जुइगु व द्यः जुइगु छता हे खँ मखु । मोक्ष जुल धायेवं मन्या
संसारलिसे पूर्ण रूपं स्वापू तनावनी, वया नाताकुता धयापि नं सुं हे
दइमखुत । भीथाय्यागु दर्शनकथं द्यः जुयावपिनि दे, समाज व परिवार
लिसे स्वापू दया हे चवनी, छैय् ःह्यागु ज्या याःसां इमित नं थ्याकाः
पुज्यानाः स्वापू तथा हे चवनेमाः । मोहनिया पचलि मलः कुन्हु पचलि
आजुया थाय् पुज्याः वइपि व द्यः दर्शन याः वइपिनिगु ल्याः चाः हे
दइमखु । अथे हें थापं व स्याकुत्याकु कुन्हु अनलि पाहां चहेबले नं
लूमरि, कंग अजिमा द्यः तय् थाय् पुज्या वइपि उत्तिकं हे म्वः म्वः
दयाचवनी । खय्तला अबतारवादी पुराणपन्थीतय्सं आजुद्यः दक्वसित
महाद्यःया अबतार भैरव व अजिमा द्यःतय् पार्वतीया अबतार भगवती
काली आदिया विभिन्न नां छुनाः उज्वःगु हे भावं द्यः दर्शन याः वइपि
नं अन यक्व मदुगु मखु, अथे जूसां नेवाः संस्कृति कथं याम्ह द्यः धकाः
इमि हने मास्ते मवयाः इमिसं धय्सुना वयाच्चंगु दर्शनकथं हे द्यः हनेगु
पूर्वाग्रह कयाः अथे यानाच्चंगु खः । पुराणवादीतय्सं ला वसन्तपुरय्
च्वंम्ह तलेजु आगं द्यः रूपम्ह द्यः मय्जु लाय्कू कुमारीयात श्यकं महा-

द्यः या काय् स्कन्द कुमारया शक्तिरूप कौमारी धकाः तवकं घायेगु
यानाच्चंगु मसिउगु खँ मखु । उकि उज्वःपि फुवकं मनूद्यः त खः । इमि
भौलिसे सदां स्वापू दया हे च्वनी ।

द्यः जुइगु घयागु थुज्वःगु अवस्था खः कि गुकी मनूतय्के छ्छा
तःधंगु शक्ति बुया वई, अले मनूतय् जीवनय् वये फुगु दुःख कष्ट व
मभिगु खँ चीकाः थः याकःचित्त जक मखु, थःलिसे स्वापू दुपि सकसितं
कल्याण याना च्वने फइ । पचलि आजु थिज्याःपि आजुद्यःत व कंग,
लुमरि, लुति थिज्याःपि अजिमाद्यःतय्सं देशय् हे सुरक्षा यायेगु ज्या
यानाच्चंगु दु घकाः न्हापांनिसें भाःपिया वयाच्चंगु दु । अथे जूगुलि
इमित नखः चखःबले व इमिगु जात्राबले नापं सकसितं सम्हय् छायाः
जीव बलिभोग बियाः तःच्चतं मानेयाना तःगु खः । परिवारय् सुयां
जन्मन्हि जक जुल घाःसां पूजा छ्वयाः इमित त्वःमंकी मखु । मोहनिबले
पायाः द्यः जुयाः मनूत जिगिजिगि खानाः आगंववथां पिहाँचइबले,
अथे हे द्यःप्याखनय् आजुद्यः अजिमाद्यःत जुयाः प्याखं हुलीपि प्याखंम्बः
तय्के नं द्यःया शक्ति बुया वयाच्च्वनी । अथे जुयाः हे इमित जात्रा
स्वःवःपि व प्याखं स्वःवःपि मनूतय्सं धात्थेयाम्ह हे द्यः भाःपियाः
भाग्यानाः पुज्यानाः मानेयाई ।

खय्तला इपि प्याखंम्बः द्यःत सदांया लागी हे द्यःजूपि मखु, ज्या
सिधयेवं इपि हानं साधारण मनूया रूपय् लिहां वइतिनि । सदांया लागी
द्यः जूपिनि ला इमिगु भौतिक शरीर दइमखु, इपि छुं जन्तरय् बाय्
कलशय् दुबिनाः हानं मनूया रूपय् वये म्वाय्क हे द्यः जुयाच्च्वनी । थथे
जुइगुयात सिद्ध जुइगु घकाः घायेगु यानातःगु दु । थन पचलि आजु व
मेमेपि अजिमाद्यःत थथे हे सिद्ध जुयावपि न्हापां मनू लिपा द्यः जूपि
खः । थुगुकथं मनू हे द्यः जुइगु लक्ष्य जुयाच्चंगु नेवाःतय्सं घय्सुना वया-
च्चंगु 'नेवाः दर्शन' खः । थव विश्वय् हे गनं मदुगु छगू नेवाःतय्गु
मौलिक दर्शन खः ।



३. नेवाः संस्कृतिया ऐतिहासिकता

संस्कृति धायेवं परम्परागत रूपं मनूतय्सं हनावयाच्वंगु रीति-
रिवाज आदिया खँ जुइ । उकि संस्कृतिया इतिहासलिसे सत्तिक हे स्वापू
दइगु खँ सत्य खः । थ्व हे खँयात कयाः नेपाः देशय् च्वंपि नेवाःतय्गु
संस्कृतिया न ऐतिहासिकताया बारय् वाला स्वयेगु तःसकं आवश्यक
जृगु ताल । थन थ्व हे खँय् छुं भती वालेगु कुतः याये ।

दक्वले न्हापां नेवाः संस्कृति गनं गुड्लेनिसें न्ह्याना वयाच्वंगु खः
धयागु खँय् बिचाः यानाः स्वयेबले आःतक्क थथे हे धकाः क्वःछी फुगु
ऐतिहासिक प्रमाणत ल्इके मफया हे च्वन तिनि । उकि यानाः मनूतय्सं
थः थः कथं मनी लूथे व्याख्या यायेगु नं यानाच्वन । थःत छिथे च्वंगु
छकूचा जक च्वः लुल धायेव उखे थुखेया छुं हे च्यूताः मतःसे यः यः थे
व्याख्या याना यकेगु यक्क जुयाच्वन ।

विशेष यानाः नेवाः संस्कृतिया बारय् भारतीय संस्कृतिया समर्थक-
तय्सं पुराण, धर्मशास्त्र, तन्त्रशास्त्रत न्ह्यथनाः नेवाः संस्कृतियागु ज्याखँ-
यात जबर्जस्ती पुत्त पुइकाः उखेपाखे हे लाकेत कुतः यानाच्वंगु दु ।
सांख्य वेदान्त आदि हिन्दू दर्शनया आधारय् हे नेवाःसंस्कृति नं न्ह्याना
वयाच्वंगु खँ धयाच्वन । अथे हे बौद्धमार्गीतय्सं नं बौद्ध दर्शनया आधा-
रय् नेवाः संस्कृतिया व्याख्या यायेगु यानाच्वन ।

थथे जृगुया कारण नं दु, थन नेपालय् भारतपाखें हिन्दु धर्मा-
वलम्बीत यक्क हे इलेबेले दुहां वयाः इमिसं हिन्दु धर्मया सिद्धान्त व
उकिया आधारय् छ्यलाच्वंगु संस्कृतित न्ह्याका थकूगु दु धाःसा बुद्धया
शिष्य उपशिष्यत नं थन वयाः इमिगु सिद्धान्त प्रचार याना वन । अले
थनयागु संस्कृतिइ नं इमिगु प्रभाव लाइगु स्वाभाविक हे जुल । सूर्यविक्रम

जवालीया बिचाः कथं 'दक्षिणं वःपि मनूतय्सं थःनाप बौद्ध धर्म, जैन धर्म व संस्कृत बाय् प्राकृत भाय् नं च्वना वल ।' (जवाली २०१९: २१२) थथे घायेबले उखेयागु संस्कृति त्वाक ज्यानाः नेवाः संस्कृतिया दर्शन व उकिया अभिप्रायत थथे हे धकाः थुइकेत थाकुया वन ।

नेपाःयागु इतिहास पुइकाः स्वयेबले छु खने दु धाःसा नेपाः देया आदिवासी मनूत गोपालवंशी व अनलि किरातीत खः धकाः आपाः इतिहासकारतय् धापू दु, नापं थौकन्हे इपि गुगु रूपय् च्वंच्वन घायेबले नं इतिहासकारतय् छप्वाः म्हुतुं धयाच्वंगु दु, इपि नेवाः समुदायय् हे दुबिना च्वंगु दु । आः नं नेवाःतय्गु वर्गय् गोपाली धाःपि व अर्थे हे सापू धाःपि दु, इपि गोपालवंशीत खः धायेगु यानाःतगू दु । अनलि थन च्वपि ज्यापुतय्त किराती धकाः धाइपि दु । वंगलय् च्वंम्ह आजुझःयात छः खलः ज्यापुतय्सं इमि पुर्खा यलम्बर (किराती जुजु) धकाः धयाच्वंगु दु । नापं इपि नेवाः जुयाः नेपालभाषा ल्हानाः नेवाःसंस्कृति हे हना वयाच्वंगु भीसं खना च्वनागु दु । आः नेपाल भाषा इण्डोयूरोपियन खलःया भाय् मखसे तिब्बती बर्मीज खलःया भाय् धकाः भाषाशास्त्री-तय्सं क्वःछिनातःगु दु धाःसा नेपालभाषा भारतं दुहां वःगु मखु धयागु खँ सीदत । थथे जुसेलि आदि नेवाःत नं भारतीय संस्कृति ज्वनाः थन दुहां वःपि नं मखुत । अले नेवाःतय्सं प्राचीन परम्परानिसँ हना वयाच्वंगु संस्कृति नं भारतीय शास्त्रया आधारय् न्ह्याना वयाच्वंगु नं ख हे मखुत । थ्व तःसकं बिचाः यायेमाःगु खँ खः । इन्द्रमालीया नं धापू थथे दु, '... थ्वः थ्वः मनूत उत्तरं वथाः थन च्वनेगु यात । थ्व हे जाति कालान्तरय् वयाः डे पार जाति जूवल ।' (सयपत्री वर्ष १ अक १ २०५२ ने. रा. प्र. प्र.) थुकि नं नेवाःतय्गु संस्कृति भारतं दुहां वःगु मखु धयागु खँय् तिबः बिउ ।

भारतया वैशाली वःपि लिच्छवीत थौकन्हे गुगु रूपय् च्वंच्वन धयागु खँ आःतक्कं थथे हे धकाः क्वःछी कृगु मखुनि । अनलि मल्लत ला आःतक्कं नेवाःवर्गय् च्वनाच्वंगु द हे दनि । इपि भारतं हे थन दुहां वःपि धकाः इतिहासं प्रमाणित हे यानातःगु दु । मल्ल जुजु स्थिति मल्लं भारतं पण्डितत सःताः भारतीय धर्मशास्त्र व तन्त्रशास्त्र त प्रचार याकूगु

नं इतिहासय् उल्लेख जुयाचवंगु दु । अथे जुगुलि इमिगु प्रभाव लानाः गुलिखे भारतीय संस्कृतिया खँत थनयागु मौलिक संस्कृतिइ ल्वाकज्याः वल, नापं मल्लतय्सं थनयागु नेवाः संस्कृतियात नं स्वीकार यानाः काःगुलि नेवाः संस्कृतियागु थःगु पहः नं ल्यना हे च्वन । थथे जुयाः सिद्धान्त भिन्न भिन्न जुयाः नं ल्वाक ज्यानाः छगू थें हे जुयाच्वन ।

हानं मेगु नं छगू खँ छु दु धाःसा थनयापि मूल नेवाःतय्त मंगो-लियन मूलयापि नं धायेगु यानातःगु दु । थुकिं नं नेवाः संस्कृति भारतं थन दुहां वःगु मखु धयागु सी दु । उकिं थनयागु नेवाः संस्कृतिया दर्शन बिस्कं हे खः धकाः अवश्य सकसिनं स्वीकार याये हे माः ।

आः वइ नेवाः संस्कृतियागु मौलिकता ब्यनीगु सफूत छु छु दु धायेबले छुं हे प्रामाणिकगु ग्रन्थत लुइके धाःसा फुगु मखु । वास्तवय् थीथी कारणं यानाः सफूत न्ह्यब्वये मफयाच्वन ।

सफू मदुगुया छगू कारण छु धाःसा न्हापा थन प्रेसयागु व्यवस्था मदुगुलि ल्हातं च्वयातःगु सफू हे जक दइगु जुयाः सफू साप हे म्हो जक दइगु जुल, उकीसं निगू प्यंगु जक दुगु सफू नं आगमय् दुने गोप्य यानाः तया तइ, अले उकिया अध्ययन याये न्ह्याःपित सफू ब्वनाः स्वयेगु अवसर हे मन्त । धायेत ला आःतवक नं ततःसकं महत्त्व बियाः मनूयागू हि च्वयातःगु सफूत गनंगनं आगमय् दनि । अनुसन्धान यायेत मात्तुमाला जूपिं छम्ह निम्हेसिनं उज्वःगु सफू स्वयेगु अवसर दतं नं विशेष विधि मयावकं सफू पुइके हे मजिउगु धयातःगु जुयाः सफूया द्यवः जक स्वयाः पुइका स्वयेगु साहस याये मफुगुलि अर्थे त्वःता थकूपि दु । उकिं सफू 'दु ला दु' धायेगु जक जुल ।

अनंलि सफूत मदयावंगुया मेगु कारण नं दु । थन इलेबेले पिने थी थी थासं मभिपि मनूत दुहां वयाः आक्रमण हे याः वःपि दु धयागु इतिहासय् धयातःगु दु । उगु इले थनयागु यक्व हे ऐतिहासिक महत्त्वया वस्तुत स्यंका थकूगु दु धकाः धायेगु यानातःगु दु । समसुदीन इलियासं थनयागु यक्व हे सफूत छ्वयेकाः हे नाश याःगु दु धाइ । अथे हे शंकराचार्य नं यक्व ग्रन्थत मदयेका बिउगु दु धयागु मनूतय् धापू दु । अनंलि

क्रिश्चियनतय्सं नं थनया धर्म ग्रन्थत नष्ट याना थकूगु खँ नं न्यने दु ।
येँ देशय् लाय्कू न्ह्यःने च्वंगु कालभैरवया लिउने यक्व धर्म ग्रन्थत बँय्
गाः म्हुयाः तयाः चां ल्हानाः तयातःगु दु धकाः थब खँय् पत्याः यानाः
आपाः नेवाःत धर्मग्रन्थ दुगु थासय् तुति न्हुइ मत्यः धकाः कालभैरव छः
हे चाः महिउसे न्ह्यःने पाखें दर्शन जक यानाः वनीगु चलन आःतवकं
दहे दनि ।

धाथें हे धायेगु खःसा लिखित जक प्रमाण जुइ धायेगु नं पूर्ण सत्य
जुइमखु । गुलि अलिखित खँ त परम्परागत रूपं इतिहास च्वनाः वया-
च्वंगु दयाचवनी । उज्वःगु खँ उचित कथं नाला कयाः प्रमाणया रूपय्
स्वीकार यायेमाः । अथे जूगुलि थन नेवाःतय्सं हनावयाच्वंगु सांस्कृतिक
ज्याखँत व इमिसं छ्यलावयाच्वंगु व्यवहारय् खने दयाच्वंगु खँत नं छगू
कथं अलिखित इतिहास खः, उकिया आधारय् वालाः स्वयेबले नेवाः
संस्कृतिइ सुलिसे ज्वः मलाःगु बिस्कं हे दर्शन दु धयागु खँ यच्चुक हे
खने दु ।



४. नेवा दर्शनया विशेषता

(क) सामाजिकतावादी सिद्धान्त,

थन नेवाःतय्सं हनावयाच्चंग् संस्कृतिया दार्शनिक सिद्धान्त व्यक्ति-वादी मज्जेसे सामाजिकतावादी खः । विज्ञानवादीतय्सं भौतिक पदार्थयात फच्छिफत्तले जीवनय् प्रयोग यानाः अनेकथंयागु सुखसुविस्ता प्राप्त यानाः आनन्द कायेगु जीवनया लक्ष्य खः धकाः धयाच्चनी धाःसा अध्यात्मवादीतय् धारणा कथं भौतिक पदार्थपाखें दइगु सुखत अस्थायी क्षणिक जुइगुया नापनापं मनूतय् विलासी दयेकाः अनैतिक तक्क न यानाबिइ फुगुलिं थुज्वःगु भोगविलासया सुखपाखे आकषित मज्जेसे थःगु आत्मा म्हसीकाः आत्मज्ञान कयाः आत्मसन्तोष कायेगु हे दक्वले तःधंगु आनन्द खः धकाः थुज्वःगु धारणा नुगलय् तयाः अध्यात्मवादीत संसारया सुखभोगं तापाक्क च्वनाः थःगु मनयात जबर्जस्ति विनाः आत्मदर्शन यायेगु धकाः कुतः यानाच्चनी ।

थनयागु नेवाः दर्शनया सिद्धान्त कथं व्यक्तिगत स्वार्थयात जक न्ह्यःने तयाः भौतिक वस्तुयात जक महत्त्व बिइगुया नापनापं नैतिकता हे त्वःताः ला लाःथे यानाः विलासी जीवन हनेगुयात क्वह्यंगु ज्याः भाःपिया तःगु दु सा अध्यात्मवादीत थें परिवार, समाजयात नापं त्वःता याकःचा ज्याः आत्मसन्तुष्टि कायेगु न बांलाः तायेकेगु मयाः । न्ह्यागु ज्याय् नं समाजया फुक्क जःत बाय् खलःत मुनाः ज्याखंत पूर्वकेमाःगु थिज्याःगु च्वछायेब्रह्मःगु बिचाः थुगु सिद्धान्तय् दुध्यानाच्चंगु दु । अथे जूगुलिं थनयागु संस्कृतिया सिद्धान्त धार्मिक जुयाः नं सामाजिकता व राजनैतिकताय् थ्यंक स्वापू तयाः सकसितं भिनीगु उद्देश्य दुगु सिद्धान्त जुयाच्चंगु दु । नेवाःतय्सं हनावयाच्चंगु व्याक्कं सामाजिक ज्याख व

गुलि गुलि राजनीति दुने लाःगु ज्या थ्यकं थनयागु संस्कृति कथं पूर्वके माय्कातःगु दु, यदि उकिइ लाः लाःथे जुल धाःसा उकिया लिच्चः न बांलाइमखु धयागु धारणा कयातःगु दु ।

समाजय् मुयां मचा बुल धाःसा नां छुइगु ज्यानिसे कयाः जा नकेगु, कय्तापुजा यायेगु, इहि यायेगु आदि सकतां ज्या परम्परानिसे थःगु पहलं हनावया च्वनापि आगंद्यः दिग्द्यःत पुज्यानाः पूर्वकेमाः । आगंद्यः दिग्द्यःतय् प्रतीकया रूपय् छुं वस्तुत न्ह्यःने तयाः (ग्वःगु ग्वय्, बाय् जाकि पुचः बाय् किसलि तयाः) पुज्यानाः धौसगं ख्येसगं बियाः विधि यायेमाः । थुज्वःगु विधित छुं शास्त्रोक्त मखसे परम्परागत रूपं याना वयाच्चंगु खः नापं थुकिइ दार्शनिक सिद्धान्त नं दुसुलाच्चंगु दु । परम्परागत धायेमात्रं अन्धविश्वास थें जक यानातःगु मखु । थुकि सी दु कि भीगु संस्कृतिइ सामाजिकताया गुलि महत्त्व दु । यःयागु वरदान प्राप्त यानाः थः याकःचिया जक भि जूइकेगु व्यक्तिवादी बिचाः भीथाय् म्याः भचा हे खने मदु ।

राजनीतिया खँय् नं देया गद्दीनसीन जुजुयात राज्यया अभिभारा बिइगुया रूपय् वसन्तपुरय् यःछेय् च्वंम्ह तलेजु कुमारीं दँय् दँस्कं येयाःया नानिचायाः कुन्हु तिका बिइगु ज्या जुई । अनलि भिनिदँय् भिनिदँय् छक्कः मोहनिया चालकुन्हु छक्कः पचलि आजुं मरुसतःया न्ह्यःने च्वनाः, अले छक्कः लुमरि अजिमां मखनय् सिदुवातय् च्वनाः खड्ग हिलाः खड्गसिद्धि बिइगु ज्या राष्ट्रिय समारोह यानाः पूर्वकेमाः । थुगु कथं जुजुं सिद्धि प्राप्त यानाः देशय् च्वपि सकल जनतायात रक्षा यायेगुया नापं सुख बिइगु जिम्मा कयाः ज्या याये फइगु धारणा खः । थ्व परम्परायात पूमवंकल धाःसा देशय् छुं मखुथे जुइफु धयागु खँ नं धायेगु याः । थ्व थनयागु राजनैतिकतालिसे संस्कृतियागु स्वापू दुगुया दसि खः ।

(ख)संघर्षवादी सिद्धान्त,

थनयागु धार्मिक क्रियाकलापया नं थःगु हे बिस्कं पहः दु । यः पुज्यायेबले पौराणिक यःतय् पुज्यायेबले थें 'अन्यत्र शरणं नास्ति

त्वमेव शरणं मम' धकाः सम्पूर्णं रूपं द्यःया शरण्यं वनेगु सिद्धान्त मखु । थःत माःगु सकतां द्यवं पुरेयाना बिइ धकाः द्यःया भरय् मिखा तिसिनाः ल्हाः प्वः चिना च्वनेगु खँयात थन मान्यता मदु । पुराणय् भक्त प्रल्हादयात नारानद्यवं थः हे थाय् थासय् वनाः संकटं बचय् यानाः अन्त्यय् नरसिंह अवतार कयाः हे प्रल्हादयात दुःख बिया च्वंम्ह हिरण्यकशिपुयात बध याना बिल, प्रल्हाद ला 'स्याये सां स्या, पाले सां पा' धकाः नारानद्यःया शरण्य् ल्हाः प्वः चिना च्वंगु बर्गन दु । भीगु नेवाःसंस्कृतिइ धाःसा द्यवं छुं याःवइ मखु, फुक्कं थम्हं हे यायेमाः धमागु बिचाः दुध्याना च्वंगु दु । बरु द्यः पुज्यायेबले मनूयाके शक्ति वुया वयाः अनेक ततःधंगु संकटलिसे थ्यकं ल्वानाः ज्या सफल यायेफइ धयागु सिद्धान्त दु । थुक्किया उदाहरण मोहनिबले पायाः पिहाँ वइगुयात कायेफु । अन नरसिंह पिहाँ वःथें द्यः पिहाँ वइगु मखु, मनूत हे द्यः जुयाः जिगिजिगि खानाः मभि तत्त्वतलिसे संघर्ष यायेत पिहाँ वइ । उकि थ्व संघर्षवादी सिद्धान्त खः, शरणवादी मखु । थुज्वःगु सिद्धान्तं मनूयागु शारीरिक मानसिक व बौद्धिक शक्तियागु जीवनय् तःधंगु महत्त्व दु धकाः वयनाच्चंगु दु । अथे जूगुलि थनयागु धार्मिक धारणा समाज त्वःताः बनय् वनाः तपस्या याः वनेगु अथवा छेंय् हे च्वंसां नं सुलिसे छ्वासमिस मयाःसे याकःचा अलग्ग उपाय् च्वनाः द्यः भक्ति यायेगु थिज्याःगु अव्यावहारिक मखु, उकि नेवाः दर्शन संघर्षवादी खः, पलायनवादी मखु ।

(ग) लौकिक रूपम्ह द्यः हनेगु सिद्धान्त,

पुराणय् हँय् गया च्वंम्ह ब्रम्हाया प्यंगः छ्यं, गरुड गया च्वंम्ह बिष्णुया प्यपा ल्हाः, दोहं गया च्वंम्ह महाद्यःया छ्यनय् चन्द्रमा व गङ्गाखुसि आदि अलौकिक रूप दुपि द्यःतय् बारय् वर्गन यानातःगु दु । थन धाःसा उज्वःगु अलौकिक काल्पनिक रूपम्ह मखसे मनूत व मनूतय्सं जीवनय् छ्चलेमाःगु वस्तुतय्त हे द्यः मानेयाना तःगु दु । थथे मनूत द्यः जूपिनिगु उदाहरण ला यक्व हे कायेफु, आजुद्यः अजिमाद्य या रूपय् पुजा फयाच्चवंपि गुलि द्यःतय्त आःतक्क नं द्यःखलःया मनूतय्सं इमि

सुखी धकाः धायेगु याना हे च्वंगु दु । अनंलि येयाःबले जात्रा याना हइपि गनेद्यः, भ्यल्लु, कुमारीत व द्यः प्याखंया प्याखंम्वः द्यःत नं मनू हे खः ।

अनंलि वस्तुत द्यः माने धायेगुया नमुना नं यक्व हे दु । दक्खले न्हापां ला भी च्वनेगु याना तयागु छेयात भीसं न्ही न्ही द्यः धकाः भाःपियाः पुज्यानाः मूलखां पिहाँ वक्व पत्तिकं दुहाँ वक्व पत्तिकं भाग्या-येगु याना च्वनागु दु । अथे हे मोहनिबले आगमय् पुज्याये माःगु खड्ग व थापिले तयेगु थ्वं, अय्लाः, सम्हय् ज्वलं त, स्वन्तिबले पुज्यानातयागु धनसम्पत्तित व थिला पुन्हि कुन्हु कू पुज्यानातयागु अन्न बालितय्त द्यःया रूपय् मानेयाना हे वयाच्वनागु दु । थुकिं छु क्यनाच्वंगु दु धाःसा द्यः धयाम्ह सुं अलौकिक शरीरधारी व्यक्ति मखु, व छगू शक्ति खः । उज्वःगु शक्ति मनुयाके व छुं वस्तुतय्के च्वन धायेव मनू व वस्तु नं द्यः जुई । थ्व खँ भीसं यानाच्वनागु व्यवहारं स्पष्ट क्यनाच्वंगु दु ।

(घ) धार्मिक सहिष्णुताया विशेषता,

प्राचीन कालनिसें नेपाःदेशय् धार्मिक सहिष्णुता दयावयाच्वंगु खँय् नेपाःमि सकसियां न्हाय् तःपु । अथे जूसां छु जुयाः थ्व सहिष्णुता दुगु धयागु रहस्यया खँ धाःसा आपाःसिनं मसिउ । मेमेथाय् देशय् धर्मया खँय् हि बाः बाः न्हाक्क ज्यानका ज्यान वंक ल्वापु ज्या च्वनी, भीथाय् धाःसा धर्मया बारय् गुळें हालेतक्कं म्वाः । थ्व नेवाः संस्कृतिया नेवाः दर्शनयागु सिद्धान्तं यानाः जूगु खः ।

नेवाः दर्शनया सिद्धान्त कथं मनू व मनूयात माःगु वस्तुयात द्यः भाःपीगु खं यानाः धन न्हाय्म्हं द्यः, न्हाय्गुं द्यः जुल । अले मेमेगु दर्शन कथं यापि द्यःत नं हनेगुली छुं विरोधया खँ मन्त । अथे जूगुलि हिन्दु द्यःतय्गु मूर्तित व बौद्ध द्यःतय्गु मूर्ति व चीभाः द्यःतय्त नं छिमिगु जिमिगु धकाः भेदभाव मतःसे पुज्यानाः हनेगु यानाच्वन । पुज्यायेबले धाःसा थःगु हे सिद्धान्त कथं थः सरह हे भाःपियाः थम्हं छु नयागु खः, व हे द्यःयात नं द्यायाः पुज्याना च्वनी । एकादशी कुन्हु नारान्द्यःया उपाय् च्वनेबले, अथे हे अष्टमीकुन्हु भगवान् द्यःयागु उपासना यायेबले

अभ्यः (ला, ख्ये, अय्लाः आदि) मनःसे ज्या पूर्वकूसां बर्त सिधयेकाः कन्हेकुन्हु 'नै पयनेगु' धकाः सम्ह्य् ख्ये सगं कयाः थःगु संस्कृतियागु सिद्धान्त त्वःतीमखु । गुलि थासय् ला महाद्यः नारानद्यःयात थ्यकं सम्ह्य् छायाः पुज्याना च्वनी । द्यःयात नं थःथे भाःपियाः व्यवहार यायेगु खँया छगू नमुना भीसं थ्व नं कायेफु कि छुं नं द्यःपुजा सिधयेकाः भव्य नयेमाल धाःसा दक्वले च्वय् द्यः भाग तयेगु धकाः थः सरह हे द्यःयात नं भ्वजय् इवल्य् पयतुकेगु ल्याखं थाय् तथा तइ, अले थम्हं नक्व द्यःयात नं छता हे मद्रकुमे तथाः माने यानातइ । अन द्यःयात 'थ्व जिउ, थ्व मजिउ' धकाः छुं बार दइमख्, सकतां जिउ, सकतां तयेमाः । थथे न्ह्याम्ह द्यःयात नं थःथे भाःपीगु भीगु संस्कृतियागु सिद्धान्त जूगुलि थन धार्मिक ल्वापु जुइगु लँ हे मदु । देया जुनु नापं गुब्ले पशुपतिइ, गुब्ले कृष्ण मन्दिरय् द्यः दर्शन याःवसां गुब्ले कुमारीया पाली भ्वपुइमाः, अले सम्यक् न्यायेकीबले सम्य् द्यःतलिसे इवः छुताः बुद्धपुजा नं फः वनेमाः ।

खय्तला थुगु विषयय् बुद्ध भगवान्यात नं नारानद्यःया हे छगू अवतार धयाः, कुमारी धयाम्ह नं पौराणिक देवी हे खः धकाः तर्कत न्ह्यब्वयाः खँ ल्हाइपि मदुगु मख्, अथे जूसां न्ह्याम्हेसिनं न्ह्यागु कथं यानाः खँ त्याकेत स्वःसां थन धार्मिक ल्वापू मज्जुली नेवाः संस्कृतियागु नेवाः दर्शनया सिद्धान्तं भूमिका म्हिताच्चंगु खँयात स्वीकार मयाःसे गा हे मगाः । छायाःसा पुराणया मुख्य थाय् जूयाच्चंगु हिन्दुस्तानय् थन थें न मनू रूपम्ह कुमारी हे दु, न देन्यकं पलाःचा पत्तिकं चीभाः द्यःत हे ध्वःदुइ । अन धार्मिक समानता व धार्मिक सहिष्णुता ला द हे मदु धाःसां पाइमखु ।

थथाय् थुइकेमाःगु खँ छता छु दु धाःसा थन न्ह्याम्ह द्यःयात नं मानेयानाः पुज्यायेगु चलन दुगुलि यानाः मेमेगु संस्कृतित नं दुहाँ वयाः ल्वाकज्यानाः थनयागु मौलिक संस्कृतियात म्हसीकेत थाकुल, उकिं यानाः यक्व भ्रम त व्वलनाच्चंगु खने दत । थुकिइ भीसं छुं पूर्वाग्रह मकाःसे थःगु बिस्कं विशेषता दुगु संस्कृति व दर्शनयात थुइकेत कुतः यायेमाः ।

(ड) बर्तमान परिस्थितियात त्वःगु,

भीसं समाजय् जन्म काये धुंसेलि थःगु परिवारप्रति अले समाज व देशप्रति नं यायेमाःगु कर्तव्य पूर्वकेमाः, खालि छः भक्ति जक यानाः फुक्कं कर्तव्य त्वःताः जुइगु नं बांलाःगु भिगु ज्या जुइमखु । माःथाय् अन्यायया विरुद्धय् सः नं तये फयेकेमाः, अझ मालावन धाःसा माःमाः कथं त्वाये नं फयेकेमाः नापं आवश्यक थासय् सहलह दयेकाः मेल व शान्ति नं जुइके फयेकेमाः । थ्वयां अप्वः थःगु समाज व देया विकास, उन्नति यायेया लागि माःमाः कथं रचनात्मक ज्याखंत नं पूर्वकाः न्ह्यःने बनेमाः । मनूया जीवनय् मयासं मगाःगु थुज्वःगु ज्यात यायेमुया लागि ग्वाहालि याइगु संस्कृति हे बांलाःगु संस्कृति जुई । थुज्वःगु सामाजिक ज्यात पूर्वकेत पङ्गः जुइगु संस्कृति जुल धाःसा उज्वःगुयात भीसं त्वःते नं माः । थथे जुल धाःसा तिनि भीगु समाजया विकास नं जुइ फई नापं देशय् भीसं महत्त्वपूर्ण भूमिका म्हिताः देयात नं उन्नतिया च्वकाय् थ्यंके फइ ।

थौं नेवाःतय् गौरवया हे खँ धायेमाः, नेवाःसंस्कृति समाज व देशगु छुं ज्याय् पङ्गः मज्जे भन् ग्वाहालि हे याये फइगु जुयाच्वंगु दु । अझ धायेमाल धाःसा नेवाः वर्गयात हे छप्पं जुयाः ज्याखंत यायेया लागि लं नापं कयनाः नेवाःसंस्कृति न्ह्यःचिलेत तिबः बियाच्वंगु दु । समाजया सकलें मनूत मुनाः तखःत हनेगु, गुथि गाना न्यायेकेगु आदि संस्कृति नेवाःतय् इलेब्यले छथासं मुनाः न्ह्यःने वयाच्वंगु समस्यात ज्यकेत छप्पं जुयाः न्ह्याः वनेगु लं कयनेगु यानाच्वंगु दु । भीसं थुइके जक माला-च्वन, भीत माःगु सकतां भीगु संस्कृति बियाच्वनी ।

बरु वैदिक पौराणिक संस्कृति त्वाकज्यानाः भ्रम ब्वलनाः मखुथे मखुथे बिचाः यायेगु प्रवृत्ति भीके हे गनंगनं वयेगु यानाच्वंगु दु । उकि-यात ससि ल्ययेथें ल्ययाः चीकेमाःगु दु । थौंकेहे ला हानं पश्चिमी सभ्यताया नक्कल यानाः भीगु संस्कृतिलिसे छफुति हे मत्वःगु म्वाःमदुग् तमासा यायेगु चलनत नं धमाधम न्यंक भनं खने दया वयाच्वंगु दु, गुगु सामन्ती प्रवृत्तियागु धकाः भूसीदयेक हे खने दु । थुकि भीगु समाजयात

इवाकलय् थुनेगु ज्या यानाच्वंगु दु । थुज्वःगु खंतय्त 'थ्व सामन्तीतय्गु
षडयन्त्र खः' घकाः थुइकाः भीमं भीगु संस्कृतिया सिद्धान्तयागु बः कयाः
वान्छ्वयेमाःगु दु ।

नेवाःसंस्कृतियामु सिद्धान्त बाय् नेवाः दर्शनं समाज व देयापाखें
उदासीन जुयाः निष्क्रिय ज्याः छः भक्ति जक याना च्वनेगु घारणायात
गुल्हे हे थाय् बिइमखु, नापं आडम्बर तमासा कयनाः तःमिपिसं चीमि-
पिन्त क्वह्यंकाः दंगु लोकप्रियता कायेगु थि ज्याःगु नीच सामन्ती
प्रवृत्तियात ला गुगुं थासय् नं मान्यता मबीगु जक मखसे हाकुतिनाः हे
छ्वयेगु प्रेरणा बिइ । थुज्वःगु विशेषता दुगु नेवाःसंस्कृति खः, नेवाः
दर्शन खः घकाः भी सकसिनं मिखाप्वाः चायेकाः थुइकेमाःगु दु ।



५. द्यः पुजाया दार्शनिकता

नेवाः संस्कृतिया चलनकथं थन न्ह्याग्गु ज्या याःसां द्यः पुज्याये माः । नखः चखः वइ द्यः पुज्याये हे माल, छैय् मुं छम्हेसिया जन्मन्हि जक जुल धायेवं द्यः पुज्याये माः । जंक्व, कय्ता पुजा, ब्याहा आदि ज्या यायेबले ला द्यः पुजाया भन्तः धंगु हे महत्त्व दु । थथे द्यः पुज्यायेगु नेवाःतय्गु संस्कृतिइ छु अभिप्राय दुसुलाच्चंगु दु धकाः अध्ययन यानाः माला स्वयेगु अत्यन्त आवश्यक जू ।

संस्कृति धायेवं उकिइ दर्शन नं अवश्य दुगु तायेके माः । भीथाय् यागु फुक्कं सांस्कृतिक ज्याखँत भीगु बिस्कं पहः दुगु नेवाः दर्शनया सिद्धान्त कथं न्ह्याना वयाच्चंगु खः । उकि द्यः पुजाया ज्याय् नं छुं अर्थ दु धयागु खँ वालाः सीका यंके फुसाजकं थुक्रिया महत्त्व नं दइ, अन्ध-विश्वासया रूपय् जक हनेगु यानाया छुं अर्थ दइमखु । अथे जूगुलि थन-यागु द्यः पुजाया विधिइ गुज्वःगु दार्शनिक सिद्धान्त दु धयागु खँ अध्ययन अनुसन्धान यानाः लुइकेफुगु खँत न्ह्यब्वयेत कुतः याये ।

नेवाः दर्शनया मूलाः (लक्ष्य) मनू द्यः जुइगु जूगुलि द्यः पुजा यायेगु पूजाविधिया नं ताः पुज्याःम्ह मनू थः हे द्यः जुइत कुत यायेगु जूल । आः मनू द्यः गथे जुइफइ धकाः सीकेया लागि द्यः पुजाया छगू छगू विधिइ क्वथीक अध्ययन यानाः स्वयेबले छु सीदया वइ धाःसा मनूया जीवनय् पञ्चतत्त्वया तःधंगु महत्त्व दु । सम्पूर्ण प्राणीतय्गु जीवन व संसार हे पञ्चतत्त्वात्मक खः । पञ्चतत्त्व धयागु पृथ्वी, जल, तेज, बायु व आकाश थ्व न्याता तत्त्व खः । भीगु जीवन नं थ्व हे न्याता तत्त्व रचना जुयाच्चंगु खः । भीगु शरीरय् ला, क्वय् आदि छाःगु वस्तु गुलि दु, व फुक्कं पृथ्वीतत्त्वया भाग खः । शरीरयागु हि आदि रस फुक्कं

जलतत्त्व खः । अनंलि भीगु शरीर सदां ववाः, व ववाःगु भाग तेजतत्त्व खः । भी सासः ल्हायेमाः, सासः वायुतत्त्व जुल । अले शरीरया दुने थाय् थासय् खाली थाय् दु, व आकाशतत्त्व जुल । थुगुकथं भीगु शरीर पञ्चतत्त्वात्मक जुयाच्चंगु दु, उकिइ छगू जक तत्त्व आवश्यकता स्वयाः अप्वः बाय् म्हो जुल धायेव मनूत म्हमफयाः त्वगि जुइधुंकी, नापं गुगुं तत्त्व शून्य हे जुल धायेव मनू सि हे सिइ । अथे जूगुलि पञ्चतत्त्व हे भीगु जीवन खः धाःसां पाइमखु ।

भीगु संस्कृति कथं यायेगु छः पुजाय् नं पञ्चतत्त्वया प्रतीक वस्तुत हे छचलेगु यानातःगु दु । छः धयाम्ह शक्ति जूगुलि शक्तिरूपम्ह छःयात थःथें हे यानाः न्ह्यःने तयेया लागि पञ्चतत्त्वया प्रतीक न्याता वस्तु 'लः सिन्हः, जाकि, स्वां व जजंका' तयाः थः सरहभाःपियाः छःयात न्ह्यःने तइ । अले हानं मेगु पञ्चतत्त्वया हे रूप न्याता वस्तु (स्याःबजी, मुस्या, पाल्, छ्वय्ला व अय्लाः) तयाः सम्हय् व पञ्चमकारया रूपे सगं ज्वलं छायेगु ज्या जुइ । थथे पञ्चतत्त्वया वस्तु पूजा यानाः थः व थः खलः तय्गु जीवनया तत्त्वत पूजाय् दछायेगु रूपय् ज्या याइ । जीवनया तत्त्वत थुगुकथं पूजाय् दछायेबले उकिइ देवत्व शक्ति बुया वइ धयागु धारणा दु । अनंलि छःयागु प्रसाद कायेगु धकाः शक्ति दुबिनाच्चंगु जीवनया तत्त्वत थः थःगु जीवनय् प्रवेश याकाः काये धुनेव मनू नं दैवीशक्तियुक्त जुयाः शक्तिशाली जुइफइ । अले मनूतय्के जीवनय् वयेफुगु मभि तत्त्वत-लिसे त्वानाः थम्हं यायेमाःगु ज्या, कर्तव्यत पूर्वके फइ । थुज्वःगु दार्शनिक अभिप्राय छःपुजाया विधिइ दुसुलाच्चंगु दु । छःपुजाया बारय् विस्तृत रूपं व्याख्या मेथासय् जुइधुंकूगु दु, ★ थन सामान्य परिचय जक यानागु जुल ।

भी छुं छम्ह छः पुजाकुथी तयाः पुज्यायेमास्ति वल धाःसा त्वहं-याम्ह बाय् धातुयाम्ह (सिजः ली, धलोत, वह, लुं आदि दयेकातम्ह) मूर्ति हयाः (बाय् मूर्ति हे जुइमा, धयागु मदु, त्वहंग्वारा जक जसां जिउ) गनं तःधंगु पूजा जुइगु थासय्, जग्य याइ थासय् यंकाः प्रतिष्ठाया

★ 'कान्तिपुर' सफुली नेपालय् छःपुजाया खँ ब्वना दिसं ।

लागि तयेमाः । अन भीसं तयेयंकाम्ह द्यःया मूर्तिइ द्यः आवाहन यानाः
 द्यः दुपिकी । उलि यायेधुन धायेवतिनि मूर्ति द्यः जुइ । अले पुजाकुथी
 तयाः पुज्याये जिइ । थ्व भीगु सांस्कृतिक व्यवहारय् छचलातःगु खँ
 खः । अथे हे मनूतय्के नं द्यः आवाहन यानाः द्यः दुपिकाः प्रतिष्ठा यायेवं
 मनू नं द्यः जुइ धयागु सिद्धान्त खः । थुनियागु उदाहरण मोहनिबले
 भीसं बांलाक्क हे खना च्वनागु दु । कौलाथ्व अष्टमी कुन्हु थापं धकाः
 द्यः आवाहन यायेगु ज्या जुइ । अनंलि स्वन्हुतवक पूजा यानाः देवत्व
 बाय् शक्ति प्रतिष्ठा यानाः चालंकुन्हु प्रतिष्ठा सिधयेकाः खलःत सकलें
 खड्ग ज्वनाः पायाद्यः जुयाः पिहाँ वइ । अथे हे द्यः प्याखनय् नं द्यःतय्गु
 खाःपाः दयेकाः जन्तर घंगलात पुज्यानाः द्यः आवाहन यानाः द्यः
 प्रतिष्ठा याइ, थ्व पूजायात नासःपुजा धकाः धयातल । नासःपुजा
 सिधलकि द्यः जुइपि प्याखंम्वःतय् देवत्व प्रतिष्ठा यानातःगु मोहनि
 सिन्हः तिकाबिइ, अले जन्तर क्वखायेकाः घंगला न्ह्याकाः खाःपाः
 पुइके धुनेव प्याखंम्वः मनूत द्यः जुयाः दबुली प्याखं ह्वनी, नापं अन
 पूजा याःवः दुसा पूजा नं फइ । थ्व सकतां खँ भीगु संस्कृतिगु दार्श-
 निक सिद्धान्तकथं जुयाच्वंगु खः ।



६. मनूद्यः बिज्यासः द्यः

थनयागु संस्कृतिया दर्शन कथं मनू द्यः जुइगु खँ च्वय् घायेधुंगु जुल । अले तान्त्रिक पूजा साधना यानाः द्यः जुइफइगु खँया दार्शनिक पश्रयागु परिचय नं सामान्यरूपं स्पष्ट यायेधुंगु जुल । आः द्यः जुयावंपि मनूतय् बारय् छुं खँत न्ह्यब्वये अनिगु तायेकाः चर्चा याये त्यना ।

नेपालय् मनूत द्यः जुयावंपि यक्व दु । फंपिया थक् जुजु पचलि द्यः खः धकाः डा. कमलप्रकाश मल्लजुं च्वया दिउगु 'पूर्वज लुमंकाः' नांगु सफुली कथनातःगु दु । वंगलय् च्वंम्ह आजुद्यः यलम्बर नां जुयाच्वंम्ह किराती जुजु खः धकाः अनया द्यः खलःतय्सं घयाच्वंगु दु । अथे हे लूति, लुमरि, कंग अजिमाद्यःत नं न्हापा इलेब्यले थःछेय् वनाच्वनीपि मिसात मनू हे खः घयागु खँ इमिगु बारय् यक्व न्हापानिसं म्हुतुं म्हुतुं कना-वयाच्वंगु परम्परा कथंया किंवदन्तीतय्सं संकेत यानाच्वंगु दु, उकिया हे दसिकथं पाहां चल्हे न्ह्यनु न्ह्यः 'दुरु' च्यां च्यां' धकाः बाजं थानाः ग्वलय् च्वंम्ह पशुपति महाद्यःयात जात्रा यानाः येँ देशय् हयाः अजिमा-द्यःतय्गु मन्दिर मन्दिरय् मत तयाः पाहां चल्हेया निमन्त्रणा बियावनीगु घाइगु थिति थौनक्कं छ्यलाच्वंगु दनि । वंशावलीतं पुइकाः स्वत धाःसां नं गुलिखे द्यःतय् बारय् इपि न्हापा मनू लुयाच्वंगु खँत जुयावइ । येँ देय् भिन्ध्यः त्वालय् च्वंम्ह भिन्ध्यः तुयूखाः धाःम्ह ज्यापु, यलया वुंगद्यः यक्षराजया कान्छाम्ह काय्, बिज्यासः द्यः मखंया द्यःबाज्याया म्हाय्-मचा खः घयागु वंशावलीइ उल्लेख जुयाच्वंगु दु ।

खय्तला थुज्वःगु किंवदन्ती, वंशावलीतय् विश्वसनीय ऐतिहासिक तथ्यया रूपय् प्रमाण हे धकाः पत्याः यायेमाःगु कथं मान्यता बिइगु मयाः । अथेजुसां किंवदन्ती, वंशावलीतय् ऐतिहासिक तथ्य मालेया लागि

साधनया रूपम् माने ला याये हे माः । किंवदन्ती व वंशावलीइ ध्यातः गु
खँयात थौतक्क याना वयाच्चंगु व्यवहारलिसे गुलि पाय्छि जूवः बाय्
मवः, बिचाः यानाः छद्यानाः स्वयेबले वास्तविकता छू खः धयागु बारय्
उला वये फु ।

लूति, लूमरि, कंग अजिमापिनिगु वारय्यागु किंवदन्तीयात थौकन्हे
द्यःतयत् यानातःगु व्यवहार कथं बिचाः याना स्वयेबले छु सी दु धाःसा
पाहां चन्हेया जात्राबले असनय् द्यःखः ल्वाकेगु धकाः अन तःकेहेत
मुनीगु धाइगु चलन दु । व हे अनुसारं लूमरि कंग अजिमायागु द्यः खः
नापलाकी, उग् इले कंग खतं लूमरियागु खःयात चाःहिला संमान याई ।
लूमरि अजिमा तता व कंग अजिमा केहेँ ध्यातःगु दु । तःकेहेँ धायेमात्रं
इपि मनू ला खःगु हे जुल । थुगु कथं किंवदन्तीयागु खँ व व्यवहारया खँ
पाय्छि जूवः । अथे हे यलयाम्ह बृंगद्यःयात नं कय्तापुजा, इहि आदि
मनूयात याइगु संस्कारत फुक्कं याइगु चलनं बृंगद्यः नं न्हापा मनू हे
खः धकाः पुष्टि यायेत तिबः बिउ । अनलि विज्यासः द्यःयात मख्छेँ
बाज्यापिनि मुयां मचा बुयाः जय्बिलि मालीबले व सुं सिनाः दुखं क्यनी-
बले ब्यंके बिइगु थिति विज्यासः द्यःया मख्छेँ बाज्यापिलिसे पारि-
वारिक स्वापू दुगु खँ प्रमाणित याः ।

आः विज्यासः द्यःया बारय् विशेष खँत छुछु दु, व च्छव्वयेत कुतः
याये । तान्त्रिकपूजा साधना यानाः मनूत द्यः जुइबले गुलि शिलाया अर्थात्
त्वहंग्वाराया रूपय् सिद्ध जुइगु सा गुलि जन्तरय् व गुलि कलशय् दुबिनाः
सिद्ध जुइगु ज्याच्वन । पचलि, लूति, लूमरि, कंगद्यःत शिलाया रूपय्
द्यः जुयावपि खः, इमिगु पीठय् त्वहंग्वाराचात हे द्यःया रूपय् भीसं माने-
याना च्वना । कलशय् बाय् यन्त्रय् प्रवेश जुयावपिन्त धाःसा व यन्त्र बाय
कलशयात दुने तयाः पिने चा, कापः आदिया मूर्ति दयेकाः रङ्ग पानाः
तिसात तीकाः द्यः यानाः स्वनातइ । अथे जूगुनि पिनेयागु मूर्तियात
कलेवर धाइ, खास द्यः ला उकिइ दुने तयातःगु कलश बाय् जन्तर खः ।
अले व जन्तर बाय् कलशयात सर्वसाधारण मनू नं स्वयेफइमखु । कलेवर
हिलेमाल धायेव द्यःखलःत जक च्वनाः विधि विधानं गोप्य पूजा यानाः

कलेबर हिलाः न्हंम्ह द्यःथें च्वंक बांलाकाः थासय् तये हइ । थ्व गोप्य-
रूपं याइगु ज्यात द्यःखलःत बाहेकं मेपिसं स्वये खनीमखु ।

येँदेया विष्णुमती खुसिया पच्छिमपाखे गुँच्वय् च्वंम्ह बिज्यासः
द्यः खः । वयागु बारय् उपलब्ध वंशावलीइ थथे उल्लेख जुयाच्वंगु दुः—

“॥२ सम्बत् २४५ वैशाख सुदि १० रो ६ थ्वकुन्हु श्री ३ न्हुछेया
नायक रत्नराज थकुल त्वं विष्णुमति भद्रमति संगम स्ना बिज्याक बेलसं
राजनिह्याया शिवभद्र ब्राह्मणया म्हाच छम्ह उन्मत्ता जुयाव बिवाडाव
चोले रत्नराज थकुलं खडाव सोयाव बेलसं श्री लुतिदेवी प्रत्यक्ष जुयाव
आज्ञा दयकाव आम खँ आथेमख् आम ब्राह्मणी उयनी जुव मखु आ
ब्राह्मणी जि सरीर थुका...” थ्व अनुसारं बिज्यासः द्यः न्हापा मखँ छेँया
द्यःबाज्यापिनि म्हाय्मचा जुयाच्वन । चान्हं न्हिनं याकःचा च्वनाः
पूजासाधनाय् दुबिनाः मनूतय् मिखाय् उईं धायेकाः च्वंम्ह बःम्हनी
छंहु सिद्ध जुयाः द्यः जुयावंगु जुयाच्वन । थौं वयात हे बिज्यासः द्यः
घकाः सकसिनं श्रद्धाभाव यानाः दर्शन पूजा यानाच्वन । थुक्रियागु
दसि प्रमाणकथं थौतक्क नं मखछेँया द्यःबाज्यापिनि मचा बुइबले
ग्वय्सिन्हः छायेगु घकाः आगंद्यः, दिग्यःया नामं ग्वय्सिन्हः भाग
तयाः परिवार सकसियां नं ग्वय्सिन्हः कायेमाः । उगु इले बिज्यासः
द्यःयात नं ग्वय्सिन्हः छायेके छ्वयेमाः । अथे हे इमि खलकय् सुं सिनाः
दुखं क्यन धाःसा फिन्हुकुन्हु दू व्यक्तेत बिज्यासः द्यःया थाय् खौ तयेके
छ्वयेमाः । थुलि जक मखु, छेँय् छुं ज्या जुल धाःसा नं बिज्यासः द्यः
यात थः परिवार सरह भाग तयाः पूजा नापं छ्वयेमाः । थ्व थिति
थौतक्कं यथावत् छचला हे च्वंगु दनि । न्हापा न्हापा दच्छिइ छक्कः
मखं छेँखलःया देखा दुपि बान्यापि बिज्यासलय् वनाः अन च्वनाः
तान्त्रिकविधि गोप्य पूजा यायेगु चलन नं दुगु जुयाच्वन । थौकन्हे
छुं कारणं यानाः चलन दिना वन । आःतक्क नं दनिपि छम्ह निम्ह
बाज्यापिसं अथे पूजा यावंगु खँ खंगु व सिउगु जुयाच्वन । थ्व खँतय्सं
बिज्यासः द्यःया मखं छेँ बाज्यापिलिसे गुज्वःगु स्वापू दु घकाः
क्यनाच्वंगु दु ।

बिज्यासः द्यः यन्त्रय् वाय् कलशय् छुकी दुबिनाः द्यः जूगु खः व गोप्य जूगुलि सकसितं सीके बिइगु मयाः । यन्त्र वाय् कलशयात दुने तयाः पिने चा, कापःया मूर्ति दयेकाः छपा तुति आकाशय् पाखे पलाः तयाच्वंगु ल्याखं थस्वकाः छपा तुति पृथ्वीइ पलाः तयाच्वंगु यानाः कलेवर दयेकाः मूर्ति थनातःगु दु । थथे आवरणया रूपय् कलेवर दयेकाः स्वनातःपि द्यःत थन स्वनिगलय् यक्व दु । यलया वुंगद्यः, येंया जनबाहा द्यः, अथेहेतुं येँ, यल, ख्वपय् च्वपि भिन्द्यःत फुककं उज्वःपि हे द्यः खः । उज्वःपि द्यःतय्गु पिनेयागु आवरण रूप कलेवरत ई पुलावलिसे पुलां जुयाः ज्यलीगुया नापनापं रङ्ग रोगन नं स्यनावनीगु जुयाः इलेब्यले मर्मत यानाः रङ्ग नं पानाः बांलाका च्वनेमाः । गुलि गुलि द्यःतय्ला भिनिदँय् छक्वः फुककं कलेवर हे हिलेमाः । बिज्यासः द्यः, तेबाहायाम्ह पालाःद्यः, येँ भिन्द्यःत्वायाम्ह भिन्द्यःया भिनिदँय् छक्वः कलेवर हिलेगु ज्या याई । भिन्द्यःया कलेवर हिलीबले भिद्यः गुप्तबास च्वनीगु धकाः सुनां खनेमदइगु थासय् द्यःयात तया लच्छितक्क ज्या सनाः अले यायेमाःगु पूजात नं पूर्वकाः द्यःथासय् तयेहइ । पालाः द्यः व बिज्यासः द्यःया नं भिनिदँया मेला धकाः अथे हे गोप्य रूप ज्या पूर्वकी । अथे कलेवर हिलेबले गोप्य तान्त्रिकविधि कलेवरयागु प्रतिष्ठा पूजा यायेमाः ।

थन छगू सीकेमाःगु खँ छु दु धाःसा भीथाय् भीगु संस्कृतिइ भिनिदँया ईयात त.धंगु महत्त्व बियातःगु दु । मनूतय्गु जीवनय् भिनिदँ पुलकि छगू हिलासू वइ । अथे जूगुनि सुं मचाया भिनिदँ पुलीगु जन्मन्हि वल कि भिसामचा जूसा भिनिग्वः योमरिया माः दयेकाः ववखायेकाः पसिसगं बिइ, मिजंमचा जूसा अथे हे भिनिग्वः योमरिया माः ववखायेकाः जन्मन्हि हनी । वयां लिपा भिनिदँ पुइकाः वइगु गुगुं नं जन्मन्हि लय् योमरि छुइ हे म्वाल । मचा निदँ दुसां निसें ज्वःलाःगु दँया जन्मन्हि पत्तिकं ग्वःदँ दुगु खः, वःग्वः हे योमरि माः ववखायेकाः जन्मन्हि याइ । थुकिया मतलब खः, मनूत भिनिदँ पुल कि मचाया अवस्था पुलाः यौवनया अवस्थाय् दुहाँ वंगु जुल । मनूतय् शरीरय् भिनिदँ पुलकि हिलासू वयाः यौवनया चीत खनेदया वइ, वया शरीर हे मेगु थें हे जुयाः

मनू हे मेम्ह थें खनेदया वइ । अथे जुयाः हे मुं नं मिजं मचाया कय्ना
 पुजा तक्क यागु बालसंस्कार भिनिदँ मफूनिबले हे सिधयेका तयेमाः
 धकाः बुरा बरिपि मनूतय्सं धायेगु यानाच्चंगु दु । थब हे धारणा कथं हे
 बिज्यासः छःयात नं भिनिदँय् भिनिदँय् छक्कः कलेवर हिलाः जन्मनिसें
 यायेमाःगु फुक्क संस्कारत तान्त्रिकविधि पूर्वकाः न्हूम्ह छः यानाः थासय्
 तयेहइ । अलेतिनि सकसिनं दर्शन याये जिइ ।

थौकन्हे बिज्यासः छः बौद्धमार्गीतय् छः यानातःगु दु । थुगु प्रसंगय्
 छगू लूमकेमाःगु खँ छु दु धाःसा थनया थःगु हे सिद्धान्तकथं स्वनातःपि
 तान्त्रिक छःतय् पुजारी बज्राचार्य जूसां कर्माचार्य जूसां उज्वःपि नेवाः
 संस्कृति कथं यापि छःतय् हिन्दु धर्मयाम्ह बाय् बौद्ध धर्मयाम्ह धकाः
 खँ ल्हाये मजिउ । इपि सकल नेपाःमिपिनि मंकाःपि खः धकाः भाःपी
 माः । गथेकि महंकाःछः, लुमरि अजिमा छःतय् स्वनाथकूम्ह शाश्वत
 बज्राचार्य जूसां, आःतक्क पुजारीत शाश्वत बज्राचार्यया हे खलःत
 जूसां इपि छःत बौद्धमार्गीतय् जक मखसे सकसिनं पूजा यानाः हनावया-
 च्वंगु दु । अथे हे गुलिखे थनयापि मौलिक छःतय् नं हिन्दु धर्मया
 पुराणपन्थी मनूतय्सं भैरव, काली धकाः नां छुनाः वैदिक पौराणिक
 सिद्धान्तया छः यानाः थःपाखे लाकेत कुत यानाच्चंगु दु । पचलि आजु-
 यात पञ्चलिङ्ग भैरव, लूमरि अजिमायात भद्रकाली आदि धयाः प्रचार
 यानातःगु दु । वास्तवय् इपि नेपाःदेया बिस्कं पहःयापि नेवाःसंस्कृतिया
 छःत खः धकाः सकसिनं म्हसीकेमाः ।



७. मनू सिनावना: नं छ: जुइगु धारणा

सुं मनू सित धा:सा वया क्रिया कर्म फुक्कं यायेधुनेव सीम्ह मनू छु जुइ घयागु खँय नं नेवा:संस्कृतिइ थ:गु बिस्कं हे सिद्धान्त दु । चार्वाक मतयागिसं थें 'भस्म जुइघुंकुगु शरीर हानं लिहाँ वइमखु, अर्थात् पुन-जन्म जुइमखु' धका: सीम्हेसिगु अस्तित्व सदांया लागि न्हावनी, छुं हे ल्यं दइमखत घयागु बिचा: थनयागु संस्कृतिइ गूब्लें हे गनं हे कया-त:गु मदु । मनू जव सिइ, उकुन्हु यायेमा:गु दाहसंस्कार सिधयेका: उकुन्हुनिसें दुखं च्वनेगु, अले दूब्यंकेगु घ:सू यायेगु सराद्ध यांना: प्यं थयेगु थ्यंकां छसीकथं सकतां क्रिया सिधल धायेव सीम्ह व्यक्ति छ: जुइ घयागु थनयागु धारणा ख: । क्रिया यायेगु अवस्थाय् वैदिक शास्त्रोक्त विधि या:सां बाय् बौद्धमार्गया विधि या:सां उकिइ थाय् थासय् थनयागु बिस्कं पह: दुगु मौलिक विधित नं पूर्वकेमा: । गथे कि त्व:चा: बिइगु, न्हयनुमा तयेगु, घ:सू यायेगु, अथे हे प्यं थयेबले नं आगं ब्व छायेगु, जोगिब्व बिइगु आदि विधित थनयागु मौलिक विधित ख: ।

धृगुकथं पिनें दुहाँ वयाच्चंगु विधिविधान स्वीकार यांनाकया: नं थ:गु हे पहलय् पाय्छि जुइक थ:गु संस्कृतिया सिद्धान्तलिसे ज्व: लाका: छद्यलेगु थनयागु विशेषता ख: । वास्तवय् ख नं ख:, थ:गु नेवा:दर्शनया सिद्धान्तकथं मूल लक्ष्य प्राप्त यायेगुया लागि ग्वाहालि याइगु जुल धा:सा विधि न्ह्यागु छद्य:सां छुं पाइगु ला ख हे मखु । बरु सिद्धान्तया अ:ख: जुया: मू ता: हे पाइगु जुल धा:सा उज्व:गु खँयात भीसं दुथ्याके मजिउ । थ:गु संस्कृतिलिसे त्व: मत्व: बिचा: मयासे ला: ला: थे न्ह्यागु विधि दुथ्याकेगु ज्यावन धायेव मखुगु लँय् लाना: तनेफु, अले जीवन हे उखे ला: थूखे ला: जुइकु ।

हिन्दुस्तानय् च्वंपि हिन्दुतय् धा:सा सुं मनू सिइबले दशक्रियाया कर्म सिधयेका: तीर्थश्राद्ध यायेधुनेव सीम्ह मनू मोक्ष जुयावनी धका:

सदांया लागि त्वःमंका छ्वई । इमि हानं दँय् दँय् पत्तिकं प्यंथया च्वने म्वाल । इमिगु सिद्धान्तकथं मनू मोक्ष जुल धायेव बया थ्व संसारलिसे छुं हे सम्बन्ध दइमखुत । परिवार, छेँ, दे आदि सकतां बन्धनं मुक्त जुइ घयागु आध्यात्मिक दर्शनया धारणा कयातःगु जूगुलिं छुं हे यायेम्वाःगु खः ।

पुराणत पुइकाः स्वत धाःसा सुनं सिनावं पि मनूतय् बारय् थी थी वर्णन खने दु । गनं मनू सिनावनाः हानं पुनर्जन्म काः वनेमाः घयातःगु दु सा गनं ततःधं पि धर्मात्मात स्वर्गय् वनाः द्रलंद्रः दँतक्क नं अनेकथंया सुखभोग यानाच्वनी घयागु दु । गनं भगवान्या भक्तत हानं जन्म काः वये म्वाय्क हे मोक्ष जुयावनी घकाः घयातःगु दु । थन धाःसा सिनावं पिनिगु नामं दँय्दँसं प्यं थया सराद्ध याना च्वन । आः यदि सिनावंम्ह मनूखं पुनर्जन्म काःवने धुंगुगुसा थन प्यं थया च्वनेगुया अर्थ छुं मन्त । यदि स्वर्गय् वंम्ह खःसा बाय् मोक्ष हे जुयावंम्ह जूसां नं वयाग् नामं प्यंथया च्वनेगुया छुं आवश्यकता हे मन्त धाःसा थन श्राद्ध याना च्वनेगुया औचित्य छु दु घयागु न्ह्यसःया लिखः छु ? थ्व अति गम्भीर प्रश्न खः ।

नेवाः संस्कृतिकथं धाःसा सीम्ह मनू छः जुइगु धारणा कयाः तःगुलिं छःया रूपय् इपि भीनाप हे दयाच्वनीगु भाःपिई । अथे जुयाः हे भी सामाजिक ज्यात कय्तापुजा, इहि आदि यायेमाल धायेव सीधुकूपित नं मां, अब, बाज्रा, बजे आदि नातां कयकाः इमिगु नां नां कयाः बय्लिं सराद्ध यायेमाः । अनलि दँय्दँय् पत्तिक नं सीगु दिनकुन्हु इमिगु नामं प्यं थयाः सराद्ध यायेमाः, उलिजक मखु, न्ही न्ही ज्योनाः यायेन्ह्यः सीधुकूपि मांबौपित त्वःमफीक लः बिइगु व बौ बिइगु थ्यंकां याना च्वनेमाः । सिनाः अस्तित्व मदये धुकूम्ह घकाः त्वःमंकाः छुतइमखु । भी धायेगु चलन नं दु, म्वाना च्वंतले न्ह्यागु मखुगु मभिगु ज्यात यानाः दुःख बियावंसां, न्ह्याक्व हारां जुयाः हायेकावंसां सिद्धुकल कि छः जुयावनीगु जूगुलिं छः जुइधुकूम्हलिसे तँम्वयेकाः ईख याना च्वने मजिउ घकाः मनूतय्सं खँ ल्हायेगु याः । थ्व नेवाःदर्शनं बिउगु बिचाः खः ।



८. वस्तुद्यःया रूपय् छेँ द्यः

भीगु नेवाःसंस्कृतिया विशेषताकथं जीवनय् छद्यलेत माःगु वस्तु-
तय्त नं द्यःया रूपय् हनाः पुज्यायेगु परम्परागत थिति दु । मोहनिबले
आगमय् दुने खड्ग, ख्वना आदि जीवनय् सुरक्षाया लागि आवश्यकगु
ल्वाभःत द्यःया रूपय् स्वनाः पुज्यायेमाः धाःसा स्वन्तिबले धुकुती दुने
तयातःगु धन संपत्ति व छेँज्याय् छद्यलेत माःगु तुफि, हासा, ल्वहंमा
आदि वस्तुतय्त थ्यंक पुज्यानाः नखः हनेमाः । उलिजक मखु, स्वन्तिया
पूजाय् चाकः पुजा यायेगु धकाः पिखालुखानिसें पुज्याना वयाः थःगु
छेँया लागाय् च्वंगु हिति, तुं आदि व चाकःछि च्वंपि द्यःत व क्षत्रपाल-
तय्त नं पुज्यायेमाः । श्व भीगु संस्कृतियागु महत्वं जाःगु रहस्ययुक्तगु
विशेषता खः । मनूयाके व मनूतय्सं व्यवहारय् छद्यलातःगु वस्तुतय्के
नं देवत्वशक्ति बुझकाः द्यःया रूपय् तयेगु नेवाःदर्शनं बिउगु मौलिक
धारणा खः ।

अथे हे भी च्वनेगु यानातयागु छेँयात नं द्यःया रूपय् पलिस्था
यानाः न्ही न्ही पुज्यानाः हनाच्वनेगु नं नेवाःसंस्कृतियागु महत्त्वपूर्ण पक्ष
खः । भी छेँनं दुहाँ वक्व पत्तिकं पिहाँ वक्व पत्तिकं छेँयागु मूलुखा
थियाः भाग्यानाः जूङ्गु चलन दु । सुथे ज्योनाः यायेत्यल धायेवं नं
छेँद्यःयात नि न्हापां भाग तयाः द्यछायेधुंकाः थम्हं सदां हनावयाच्वनापि
आगद्यःतय्त नं छप्यः द्यछायाःतिनि भीसं नयेगु याना च्वना । थुगुकथं
भीसं छेँद्यःयात न्हागु ज्याखँय् नं तःच्वतं मानेयाना वया च्वनागु दु ।

मनूतय्त छेँ मदयेकं मगाः, अझ मनूतय् जक मखु गुलि पशुपछी-
तय्त थ्यंकं छेँ माः । द्याय्धाःसा छेँय् दुने च्वने घुनेब प्राणीतय् थःत
सुरक्षित जूगु अनुभव याइ । न्हिच्छि थःगु ज्याय् उखें थुखें जुयाः बःन्हि

जुल धायेव छैय् बासं च्वं वयेमाः । अले चान्हे छैयागु मूलुखा व क्वथा
पत्तिकं खापात नं गल्लाक तिनाः नुगल्य् छुं कथंयागु ग्याःचिकुया भाव
फुक्कं तंकाः मन धुक्क यानाः सकलें छनी । उकिं मनूतय्गु जीवनय्
विशेष यानाः छैयागु तःधंगु महत्त्व दु ।

आः संसारय् मनूतय्सं गुब्लेनिसें छै दयेके सयेकल धयागु खँय्
थथे हे धकाः क्वःछिइ मफुसां आःतक्कया दुने छै दयेकेगुली यक्व हे
विकास यायेधुकूगु भीसं खनाच्चवनागु दु । थौं विज्ञानया उन्नति यानाः
न्हू न्हू कथं बां बां लाक्क डिजाइन पिकयाः सिमन्तियागु बल्लाक्क व
ततःजाय्क छै दयेकेगु यानाच्चंगु दु । न्हापा न्हापा चा व अण्पां छै
दनेमाःगुलि नित स्वतजाः जक यानाः क्वः छुनाः जुइमाय्क त्रिचीजाः
यानाः छै दयेकी । थौं कन्हे थें च्यात गूतजाः यानाः ततः जाय्क छै
दनीमखु । अथे नित स्वतजाः जक यानाः दनातःगु जूसां पुलां पुलांगु
छैय् तःसकं महत्त्वपूर्णगु रहस्य दुसुलाच्चंगु दयाच्चनी । छैयागु छगू
छगू अङ्गय् तान्त्रिकता दयाच्चनी । छै छखांयात हे छःया रूपय् तान्त्रिक
विधि पलिस्था यानाः तयातःगुलि छैय् च्वंपिन्त पिनेयागु मभि तत्त्वतय्
पाखें सदां सुरक्षा जुयाच्चनीगु धारणा कयातःगु दु ।

छै धयागु नेवाः संस्कृतिकथं छः जूगुलि छै दने न्ह्यः छःयात आसन
तयेमाःगु जुयाः छःया आसन रूपय् जग स्वनी । कलश ल्वहंचात व चा
पुज्यानाः उकिइ छःया आमन नाग, सिंह आदि आवाहन यानाः जग
म्हुया तःथाय् विधिपूर्वक तइ । अले उकिइ छःने छै दनायकी । भीसं
थाय् थासय् खना च्वनागु दु, देगः दयेका तःगु थासय्, अथे हे सतः,
फलचा, दवू दयेका तःगु थासय् क्वय्पाखे कू कूचाय् सिंह आकार कियाः
तःगु ल्वहंत देगः सतः क्वबियाच्चंगु ल्याखं थनातःगु दयाच्चनी ।

थुगुकथं जगयात छैयागु आसन रूपय् स्वनाः मूलूखाः छुइ धुनेव
उकिइ नं सम्हय् ज्वलं छायाः तान्त्रिकविधि पुज्याये माः । थन मूलूखा-
यात आजुद्यःया रूपय् पलिस्था यानाः छुइगु थिति दु । थुकिया उदाहरण
भीसं देगःया लुखाय् स्वयेफु । देगःया खापाय् ततःग्वःगु स्वंगः मिखा
कंकाः दथुइ लाक्क खड्ग छपु नं कियातःगु दइ । थुकि देगःया लुखा

खड्गरूपम्ह ग्राजुद्यः खः धकाः वयं । * अथे हे मनूतय् नं छेँ दयेकीबले
मूलुखायात ग्राजुद्यः भापियाः पलिस्था याइ । उकिं भीथाय् चलन दु,
सुथे न्हापां मूलूखानिसेँ वसिबू पुनावये धुनेब नी लः कया हयाः पुजाभः
दयेकाः लुखाय् न्ही न्ही पुज्याये माः । थथे लुखायात पुज्यानाः भाग्यानाः
छेँद्यःयात हना तयागुलि छेँय् दुने सकसियां सुरक्षा जुइमा धकाः
भाःपिया चवनी ।

लुखा छुइधनेव तँ पत्तिकं थःत माःमःकथं इयाःत छुनाः छेँ दना-
यंकी । इयाःत छुइबले नं चौकोसय् नाग, कलश आदि बुत्तात कियाः
बांलाका तइ । थथे नागबुत्ता तयेगु इयालय् जक मखु, लुखायागु चौको-
सय् नं तयेगु याः । थुज्वःगु बुत्ता खालि शोभाया लागि जक मखसे
तान्त्रिकतां नागद्यःयात जगय् यानाः छेँय् सुरक्षाया प्रबन्ध यानातयेगु
अर्थय् तयातःगु खः । थुगु हे कथं पिने अंगलय् नं अप्पायागु बाय् गनं
गनं सियागु कानेस छेँयात जनी चिकातःगुथें यानाः तयेगु चलन दु ।
कानेस धयागु नं नागया हे रूप खः । गुलि गुलि देगलय् ला नाम बुत्ता-
यागु हे कानेस दयेका तयाः देगःयात छ्वाःरूपरं नागं हिकाः सुरक्षा
यानातःगु भाव ब्वयातःगु दु । नागयात तान्त्रिक सिद्धान्तकथं द्यःया
आसन व तिसाया रूपय् मानेयाना तःगुलि नाग धयाम्ह नं सुरक्षाया द्यः
भाःपियातःगु दु । गनंगनं ला धुकूया लुखाय् नापं तान्त्रिक साधना यानाः
धात्थेयाम्ह नाग हे तयातइ धकाः पुलांपि मनूतय्मं खँ ल्हायेगु याः ।
थुगुकथं छेँयागु थाय्थाय् पत्तिकं द्यःत आवाहन यानाः तयेगु नेवाः
संस्कृतियागु थःगु पहः खः ।

दक्वले लिपा ग्वःतजाः छेँ दयेकेमाःगु खः, उलि दयेके सिधल
घायेव चवय् पल्लि चिइ । अले पौयात विशेष पुजाज्वलंत ज्वरेयानाः
बौ बियाः तान्त्रिक पूजा यानाः छेँयागु प्रतिष्ठा याइ । थन पौयात
(थैमायात) अजिमाद्यः धकाः भाःपियाः पूजा यायेगु यानातःगु न
गथे कि गनं तान्त्रिक पूजा यायेमाल घायेव धाल्चाय् थ्वं बाय् न

* 'नेपाःया तान्त्रिक द्यः व तान्त्रिक पूजा' सफुली 'खड्ग सुरक्षा'

चवसुइ स्वयादिसँ ।

थनाः उकिइ द्यःने द्यछापाः तइ । द्यछापातय् छ्वय्ला, सम्हय् ज्वलंत
तयाः पुज्याइ । थथे पुज्यायेबले घाल्चायात आजुद्यः व द्यछापाःयात
अजिमाद्यः धकाः भाःपिइ । थ्व हे सिद्धान्तकथं मनूत च्वनीगु छेय् नं
आजुद्यः व अजिमाद्यः निम्हं एकाकार जुयाच्च्वंम्ह धकाः तान्त्रिक सिद्धान्त
कथं मानेयानातःगु दु । थथे हे द्यःतय्गु देगलय् नं लुखा, इयाःत खड्ग
आकारय् दयेकाः देगःया च्वकाय् अजिमाद्यःया प्रतीक गजू तयाः आजू-
द्यः अजिमाद्यः एकाकार जुयाच्च्वंगु रूपय् पलिस्था यानातइ । अथे
जुयाः सुं मनूयात छुं ज्याखँय् सगं बिइमाल घाःसा धौजाकि सिन्हः
वालाः स्वक्वः तक्क थम्हं हनावया च्वनापि आगं द्यःतय् नामय् बँय्
पुज्याके बिइ, प्यक्वःया खुसी छेँ द्यःयात 'गृहलक्ष्मी' धकाः नां कयाः
घलिमय् पुज्याके बिइ । थुं कयागु मतलब खः पत्नी पलिस्था यानातःम्ह
छेँ द्यः रूप अजिमाद्यःयात पुज्यायेगु । थुं कथं छेँ यात द्यः मानेयानाः
द्यःरूप छेँ द्यः दुने च्वनाः पारिवारिक जीवन हनेगु नेवाः संस्कृतियागु
विशेषता खः ।

खय्तला थौंया वैज्ञानिक युगय् वयाः छेँ यात थ्यंकं द्यः मानेयानाः
पुज्याना च्वनेगु छ्गुकथं अन्धविश्वास हे जक थें जू वनेफु । अथे जूसां
थुज्वःगु संस्कृति मनूतय्गु भावनाय् गुज्वःगु प्रभाव लाइ, नापं मनूतय्सं
थःगु जीवनयात गुगुकथं न्ह्यःने यंकेमाः घयागु दार्शनिक बिचाः अप्रत्यक्ष
रूपं बियाच्च्वंगु खँ भीसं थुइकेत कुतः यायेमाः । द्याय्घाःसा मनू घया-
म्हेसिया दक्वसिबे तःधंगु महत्त्वया खँ नुगलय् दुने च्वंगु भावना खः ।
भावना स्यन बाय् मभिन घायेव मनू मनूया रूपय् मजूसे हिंस्रक पशु
अथवा दानवरूपय् थ्यंकं जूवने फु । उकि थःगु जीवनय् ग्वाहालि याइगु
वस्तुतय्त नापं द्यःया रूपय् हनाः मानेयायेगु धारणां मनूयाके छुं खँय् नं
बिश्वासघात यायेगु प्रवृत्ति ब्रुया वये फइमखु । जीवनय् वयाच्च्वनीगु
संकटतलिसे संघर्ष यानाः ज्यंकाः सभ्य सुमंस्कृतगु इमान्दार जीवन
थुज्वःगु संस्कृति वयनाच्च्वनी ।

५

९. नेवाःतय् दैनिक जीवनय् संस्कृति

गुगुं नं खलःया मनूतय्गु जीवन गथे च्वं घयागु खँ इमिसं हना-
वयाच्वंगु संस्कृति कयनाच्वनी । उकिं घाइ, मनूतय्गु संस्कृतिइ जीवन-
दर्शन दइ ।

नेपाः देशय् च्वंपि नेवाःतय्गु वर्गं नं छगू सभ्य ब सुसंस्कृतगु वर्गं
खः । इमिसं कयच्याना वयाच्वंगु संस्कृतिया दुने च्वंगु दर्शनं थ्व खँ
न्ह्यव्वयाच्वंगु दु । नेवाःतय्गु दैनिक जीवनय् पूर्वके माःगु ब्यावकं ज्याखँ
त इमि थःगु संस्कृतिकथं याना च्वनेमाः । छेयागु व्यवहार, थःथःगु
लजगाःया ज्यात व मेमेगु इलेबेले यायेमाःगु ज्याखँत सकतां थःगु हे
संस्कृतिकथं सिद्धान्त घय्मुनाः पूर्वका च्वनी । थ्व हे नेवाः संस्कृतिया
विशेषता खः ।

सुथे न्हापां दनाकथं मिस्तय्सं वसिब्रँ पुनाः पिने त्वहंहितिइ, कल-
हितिइ वाय् तुथिइ वनाः खाः सिली, अले नीलः कयाः छेय् दुहां वइ ।
अनंलिछेय् च्वंपि छःत, आगंछः व छेय्छःतय्त पुज्यायेधुंकाः तिनि थःगु
यायेमाःगु ज्यात याइ । मिजंतय्सं नं खाः सिलाः न्ही न्ही पुज्यायेमाःपि
छःतय्गु पुजा सिमधयेकं छुं नइमखु ।

थौकन्हे घासा 'बेड् टी' त्वनेगु क्षकाः सुथे न्ह्यलं चायेवं लासाय् हे
च्वना च्या त्वनेगु चलन नं गनं गन जुया वल । वास्तवय् थ्व चलन
भीगु संस्कृतिलिसे पाय्छि मजू । थम्हं हनेमाःपित यायेमाःगु आदरभाव
हे मतःसे थम्हं नि न्हापां नयेगु व्यक्तिवादीया खँ जुइ । मेपि सुयातं
वास्ता मयासे थःत नि महत्त्व बीगु, थुज्वःगु विचारं मनू स्वार्थी जुइगुया
नापनापं अनुशासन हीनम्ह ग्यं वनी ।

परिवारय् कब्रकालिपिसं थः स्वयाः थकालिपित सम्मान यायेकथं

छुयं क्वछुनाः भाग्यायेगु, अले थकालिपिसं नं थः स्वयाः क्वकालिपितं
 नुगलनिसं मतिना तयाः सुवाः बीगु थिज्याःगु सांस्कृतिक थिति पारि-
 वारिक जीवनय् बांलाःगु भिगु लकस दयावनाः सकसियां जीवन न्ह्यइ-
 पुयाः सुखी जुइ । नापं फुक्कलिसे क्वातुगु बांलाःगु स्वापू दयाः मति
 भिकेत स्वाहालि याइगु संस्कृति मनूतय्के अनुशासनहीनता घयागु हे
 गुब्ले वये फइमखु । अले छुं मखुगु व मभिगु ज्या यानाः थःगु स्वार्थ
 सिद्ध यायेगु बिचाःतकं नुगलय् द्रुयावइमखु । थुकिं यानाः मनूतय्के
 अपराध यायेगु प्रवृत्ति आभ्याः जक हे थाय् कायेफइमखु ।

अनलि छुं नयेगु ई वइ । कौला, ज्योनाः, तुच्चा, व्यालि यायेबले
 बाय् छुं चीधंगु तःधंगु भवय् हे नयेगु इले नं नये न्ह्यः थम्हं हनावया-
 च्वनापि, थःगु कुल परम्परानिसं पुज्यानाः मानेयानातःपि आगंचः
 छेँद्यःतय् नामं भतीचा छायेधुंकाः तिनि नयेगु याइ । छुं भवय् नयेबले ला
 दव्वले च्वय् छःभाग हे तयाः छःयात नापं भवजय् इवः छ्काः तःगु
 ल्याखं तया तइ । श्व खं छुं सीदत धाःसा नेवाः दर्शनया सिद्धान्तकथं
 छःतय् नं परिवारय् हे दुने लाःम्ह भाःपियाः छः घयापि व मनू छगू
 हे खः धकाः क्यनातःगु दु । उकिं सुं मनू सित घायेव वयागु यायेमाःगु
 क्रियाकर्म पूर्वके धुनेव व सीम्ह मनू नं छः जूइ घयागु धारणा कयातःगु
 दु । थथे जुयाः हे छुं नये न्ह्यः सीधुकूपि पितृतय्गु नामं नं भतीचा छ-
 छायाः तिनि नयेगु चलन न्ह्याना वयाच्वंगु खः । श्व धारणां सिनावंपि
 पितृत नं भीगु परिवारय् आगंचःत थें हे छः जुयाः सदां च्वनाच्वंगु दु
 धकाः विश्वास यानातःगु दु ।

श्वयां लिपा नेवाःतय् थःथःगु लजगाःया ज्याय् वनेबले नं थःगु
 संस्कृतिकथं ज्या यायेगु विशेषता दु । सुं व्यापारयागु लजगाः कयाः
 पसः तयाच्वंम्ह जूसा पसः चायेके धुनेव पसःया लुखाखलु भाग्यानाः
 दुहां वनी । अले धेबा तयेगु थलय् भिन्दः पुज्यानाः मेमे थासय् नं
 पुज्यायेमाःगु ज्या सिधयेकाः तिनि व्यापारया वस्तुत मीगु ज्या याना-
 यंकी । बःन्ही लिहां वये त्यल घायेव नं पसः तिनाः तालं ग्वये धुंकाः
 ताःयात नं भाग्यानाः छेँपाखे स्वया वइ । अथे हे सिँकःमि दँकःमि व

बुँज्या यानाचवनीपि ज्पापुतय् नं थःगु ज्या याये न्ह्यः थः थःगु ज्याय् छ्चलेमाःगु ज्याबःत भाग्यानाः तिनि ज्याय् ल्हाः तइ । थुकि छु क्यना-
 च्वंगु दु धाःसा थःत ज्याय् ग्वाहालि याइगु न्ह्यागु वस्तुयात नं द्यः
 भाःपियाः सम्मान यायेगु संस्कृति नेवाःतय्के दयाच्वंगु खने दु । उकि
 ज्या सिधयेवं सुनां नं थःत याःगु गुन ल्वःमंका छ्वयेगु प्रवृत्ति नेवाःतय्के
 मदु । इमिगु संस्कृति हे कृतघ्न जुइगु चरित्र दयेके बीमखु ।

थुगुकथं हे गुगुं नं कार्यालयय् जागिर नयाच्वंपि कर्मचारीतय्के नं
 थुज्वःगु हे संस्कृति यानाः आपाः धयार्थे नेवाःत इमान दुपि व न्ह्यागु
 ज्याखँय् नं पत्याः याये बहः जुयाच्वंगु खने दु । मखुगु अनियमित
 भ्रष्टाचार यायेगु खँ वल धायेव इमिगु संस्कृति यानाः हे उज्वःगु मखुगु
 ज्या पाखें सदां तागाक चवना चवनी । नापं मखुगु मभिगु ज्या याये
 म्वालेमा घकाः भाःपियाः नेवाः कर्मचारीतय्सं कार्यालयय् छुं च्वये-
 माःगु ज्या याये न्ह्यः थःगु च्वसात भाग्यानाः ज्या यायेगु चलन न्ह्याना
 वयाच्वंगु खः । अथे हे च्वसात बाय् छुं च्वया तयागु भ्वंत तुति थिल
 धाःसां नं मत्यःगु ज्या जूगु तायाः क्षमा पवने थें भाग्यायेगु शिति दु ।
 थौंकन्हे थुज्वःगु चलनत बुलुहुं ल्वःमंका छ्वयेगु यानाः तनावना च्वमू दु ।

धातर्थे हे नेवाः संस्कृतियात पूर्णरूपं हनाच्वंपि नेवाःतय्संला सुथे
 दनावंसां निसें बःन्ही छनेबले थ्यंकं गुलि ज्या यायेमाःगु खः, फुककं हे
 इमिगु संस्कृतिकथं हे याना चवनी । अथे घकाः अन्धविश्वासयात घय्-
 सुनाः द्यवं फुककं ज्या पूर्वका बिइ धयागु शरणवादी धारणां मखु ।
 थःके मखुगु व मभिगु ज्या यानाः अनैतिक गुब्ले हे जुइ म्वालेमा घयागु
 बिचाः कयाः संस्कृति हुनेगु यानातःगु खः । द्यः छम्हेसित न्ह्यःने तयाः
 वाय् पानाः न्ह्यागु अनैतिक ज्या याःसां द्यःया शरणय् वन धायेव द्यवं
 बचे हे यानाबिइ धयागु भावनायात नेवाःसंस्कृतिइ थाय् बियातःगु मदु ।
 नेवाः संस्कृतिया दर्शनकथं मनू हे द्यः जुइगु खः, अले मनूयात माःगु
 सकतां वस्तु नं द्यः खः । उकि मनूयात माःमाःगु ज्याखँत नं फुककं मनू
 नं हे पूर्वकेमाः, अदृश्यम्ह काल्पनिक द्यवं मखु । थ्व सिद्धान्तं नेवाःसंस्कृतिइ
 अन्धविश्वासयात थाय् बियातःगु मदु धयागु खँ यच्चुकक हे सी दु ।

अथे जूगुलि थःत ज्याय् ग्वाहालि याइपि मनू हे जूसां बाय् छुं बस्तु हे
जूसं इमित छः भाःपियाः संमान यायेमाः धकाः हनाः न्ह्यागु ज्याय्
नं ल्हाः तयेगु संस्कृति छ्यला वयाच्चंगु खः । थज्वःगु व्यावहारिक
संस्कृति खः नेवाःसंस्कृति । थव खँ सकल नेवाःतय्सं बांलाक्क थुइकेमाः,
कर्किया लगलगी ब्वाय् जुयाः थःगु मौलिकता लवःमंकाः भारतीय
शास्त्रत न्ह्यथनाः जबर्जस्ती उखेपाखे पुइकेत भी नेवाःतय्सं नि कुतः
याये मजिउ ।



१०. नखःचखः हनेगुया अभिप्राय

मनूतय्गु जीवन संघर्षयागु जीवन खः । अथे जूगुलि जीवनय् भिगु मुखया खँ जक मखु, मभिगु दुःख आपत्त्या खँ नं इलेब्यले वयाचवनी । उज्वःगु आपत् संकटलिसे त्वानाः समस्या ज्यंके फइगु शक्ति नं दयेके माल, थ्व हे खँया बिचाः यानाः विद्वान्पि मनूतय्सं अनेकथंया जीवनया सिद्धान्त पिकयाः न्ह्यब्वइ थकल । गुलिसिनं ला सवर्षमय जीवन खनाः ग्यानाः 'संसार धयागु हे दुःखया सागर खः' धयाः पलायनवादी सिद्धान्त न्ह्यब्वया वन धाःसा गुलिसिनं 'दुःख आपत् खनाः विसिउँ वनेगु मखु, त्वापेत न्ह्यचिलाः हे ज्यंकेमाः' धकाः लँ वयना वन । नेवाःदर्शनया सिद्धान्त न सधर्यंया हे लँपु ज्वनेगु प्रेरणा बियाचवंगु दु ।

भीथाय् इलेब्यले वयाचवनीगु नखःचखःतय्सं भीत जीवनय् वये फुगु अनेकथंयागु समस्यातलिसे गुगुकथं सामना यायेमाः धकाः लँ वयनाचवंगु दु । अथे जुयाः हे नेवाः संस्कृतिइ नखःचखःतय्सं तःधंगु महत्त्व दयाचवंगु खः । धार्मिक दृष्टिकोण नखःबले छः पुज्यानाः दैवी शक्ति प्राप्त यायेत कुनः यायेगु खँ ला द हे दु, नापं थः थितित व थः खलत सकले जानाः छप्पँ जुयाः ज्या सफल यायेगु मार्गदर्शन नं नखः तय्सं यानाचवंगु दु । भीस क्वथीक बिचाः यानाः स्वयावन धाःसा भीस हनावयाचवनागु मोहनि, स्वन्ति, पाहाँ चन्हे आदि नखःत धार्मिक व सामाजिक दृष्टिकोणं नं तःसकं महत्त्वपूर्ण जूगु खँ खनेदया वइ ।

मोहनि नखः धयागु शक्तिसाधना यायेगु नखः खः । मोहनि ज्वःछि आगमय् पुज्यानाः शक्तिसाधना यानाः लक्ष्मीपूजा तक्कं थःथितिपिन्थाय् नापं नखत्या वनाः शक्ति सचय यायेगु ज्या जूइ । अले स्वन्तिया म्ह-पुजाकुन्हु न्ह्यदया उपलक्ष्यय् नखः न्यायेकाः जीवनया कार्यक्षेत्रय् क्वहाँ

वनेगु खः । थन न्हूदँ धयागुया अभिप्राय शंखधर सास्वाःजुं छ्यला-
थकूगु नेपाल सम्बतया ल्याखं जक मखु, प्राकृतिक स्थितिकथं म्हणुजाया
दिन नेपाल सम्बत् छ्यले न्ह्यः नं न्हूदँया न्हापांगु दिन धकाः हनावया-
च्चंगु धारणाकथं खः । ★ थ्वया न्याला लिपा पाहाँ चहे वई । अले
बर्खाया उपाधित वइगु ई जूगुलि सतर्क ज्याः तयारी यायेगुया रूप्य
नखः हनेगु जुई । चिल्ला फुनाः चौला वयन कि वाफ्य्, ग्वःफ्य् वयेगु,
महामारी त्वय्त पिहाँ वयाः मनूतय्त दुःख बिइगुया नापं बर्खां खुसिबाः
वयाः नाश याइगु, चलः वनीगु आदि उपद्रव खने दइ । उज्वःगु उपद्रव-
तय्गु हाथ्यालिसे त्वायेफइगु शक्ति दयेकेया लागि द्यःतय्गु पूजा, जात्रा
यानाः पाहाँ चहे, पुलांमोहनि आदि नखः न्यायेकेगु जुयाच्चंगु खः ।
थुगुकथं हे मेमेगु नखःत नं ईयात त्वयेक हनेगु व्यवस्था जुयाच्चंगु दु ।
थ्व नेवाः दर्शनया सिद्धान्तकथं हे खः । गथे द्यःजात्रा यायेत मनूत छप्पं
जुयाः ज्या सिधयेकेगु खः, अथे हे मनूतय्गु जीवनय् वयेफुगु प्राकृतिक
भय व छुं भभि तत्त्वतय्गु पाखें वयाच्चनीगु दुःख सकटत लिसे नं सकलें
जानाः छप्पं जुयाः त्वानाः त्याकेफइगु धारणा भीसं हनावया चवनागु
नखः चखःया संस्कृतिइ दुथ्यानाच्चंगु दु । भीसं थ्व थुइके जक माःगु दु ।

भीथाय् नखः चखः हनेगुली यक्व हे भ्रम ब्वलनाच्चंगु दु । थज्वःगु
भ्रमयात चीकाः भीगु नेवाः दर्शनया सिद्धान्तकथंयागु दृष्टिकोण कयाः
भीगु थःगु पहः दुगु नखःचखःतय्गु महत्त्व थुइकेमाःगु दु । मोहनियागु
बारय् हे गुज्वःगु भ्रम थन जुयाच्चंगु दु धाःसा मोहनि धयागु नेपालय्
जक मखु, भारतय् नं तःजिक हनेगु चलन दुगुलि थ्व नखः भारतय्
गुगु अभिप्राय व उद्देश्य कयाः हनेगु यानाच्चंगु खः, थन नं उगु हे
आशय कयाः हनेगु यानाच्चंगु धकाः आपाःसिया धारणा ज्याच्चंगु दु ।
देवी भगवतीं महिषासुर, शुम्भनिशुम्भ आदि दैत्यतय्त बध याना बिउगु
वर्णन पुराणय् दु नापं देवी भगवतीयागु लीलाया चर्चा यानाः भाव-
भक्ति यात धाःसा उज्वःपि भक्ततय् जीवनय् अनिष्ट चिलावनाः सुख
शान्ति जुइ धयागु खँ नं पुराणय् उल्लेख यानातःगु दु । उकिं थ्व हे

★ 'नेपाःया तान्त्रिक द्यः व तान्त्रिक पूजा'यागु 'स्वन्ति नखः' स्वयादिसं ।

खँयात नृगलय् तथाः मोहनिया इले भगवतीयागु र्तोत्र पाठ आदि यानाः विशेषपूजा यायेगु चलन जुगु धारणा आपाःसिया जुयाचवन । अथे हे चालंकुन्हु नं लङ्काधीश रावणयात रामचन्द्रं स्यानाः विजय प्राप्त याःगु दिन विजयादशमी धकाः छम्हेसितं मेम्हेसित भित्तुना बीगु चलन नं व्यापक रूपं चले जुल ।

वास्तवश्च थन नैवाःतक्षं हनावयाचङ्गु मोहनिनखःया अभिप्राय सुं व्यक्तितयगु स्वार्थम् महिषासुर, शुम्भ, निशुम्भ अले रावण थिय्याःपि व्यक्तितयत् कवःथःगु ई धकाः व्यक्तिवादी धारणा कथाः मखु, सामूहिक रूपं सकसियां शक्ति प्राप्त यानाः व्यक्ति, समाज व देशय् थ्यकं वयेपुगु न्हाथिय्याःगु संकट आपत्तिसे नं त्वानाः समस्या उक्केत कुतः यायेगु खः । श्रुतिया लागि हे चरिवार बाय् खलःत सामूहिक रूपं चवनाः चालंकुन्हु खड्गसिद्धि कायेगु यानातःगु खः ।

मोहनि नखःयागु मेगु महत्त्वपूर्ण पक्ष खः भीगु नैवाःदर्शन कथं-याम्ह मनूखः कुमारीयागु पूजा यायेगु । कुमारी धयाम्ह आगंघःया रूप भाःपियातःगु दु । मोहनिबले तरुनुइ वसन्तपुरय् च्वंम्ह लायकू कुमारीयात दुत यंकाः आगं क्वथाय् तथाः तान्त्रिकविधि ओप्य पूजा यायेमाः । अथे हे मेमेथाय् आगमय् नं मोहनिबले व मेमेगु विशेष पूजा जुइबले कुमारी पुज्यायेमाः । हरेक आगंया थः थः हे कुमारीत दु । गुलिसियां शाक्य कुमारी जूसा गुलिसियां ज्यापु कुमारी । लाय्कु कुमारी शाक्य-कुमारी खःसा मखनय् तान्यबाहालय् आगमय् मोहनिया स्याकु त्याकु कुन्हु व स्वन्तिया म्हपुजाकुन्हु पुज्याना तइम्ह कुमारी ज्यापु कुमारी खः । आगंघः धयाम्ह देखा मदुपि व आगंखलकय् दुमथ्याःपिसं स्वयं मजिउगु नियम दुगुलि सकसिनं दर्शन याये जिउगु यानाः आगं आगंया कुमारीत तथातःगु खः । उकि कुमारी धयाम्ह नैवाःसंस्कृतिया सिद्धान्त-कथं याम्ह मौलिक छः खः । मोहनिबले आगंघः रूपम्ह कुमारीयात पुज्यानाः कुमारीयागु ल्हातं तिका कायेगुलि जीवनय् तःधंगु शक्ति प्राप्त जुइगु विश्वास दुगुलि देशय् हे कुमारीयागु तःधंगु महत्त्व दुगु खः ।

थुज्वःगु महत्वं जायाचवंगु मोहनि नखःया खँयात कपिनिगु लग-

लगी ब्वाँय् जुयाः महिषासुर, शुम्ह, निशुम्भ, रावण आदि व्यक्तित्व नखः
 ववह्यकाः खँ ल्हानाः इमित ववःथःगु ई धकाः उत्सवया रूपय् नखः
 हनाः भवय् नयेगुलि भी गुलि मतिमभिपि धकाः प्रमाणित मजुइला ?
 घात्थे घायेगु खःसा ला महिषासुर आदि 'दैत्यतय्गु व्यक्तित्व गुज्वःगु
 धकाः भीसं सिउगु हे मखुनि । पुराणय् स्वःसा दैत्यतय्सं स्वर्गय् च्वनाः
 मोज याना च्वंयि इन्द्र आदि देवतातय्त्त स्वर्ग' पितिउंगुलि देवतातय्गु
 प्रार्थनाय् भगवती दैत्यतय्त्त स्यायेगु ज्या जूगु क्यनात गु दु धाःसा
 देवतातय्गु स्वार्थय् महिषासुरपित स्यात घायेवं भीथिज्यापि सर्वसाधा-
 रण जनतां उकिया उपलक्षय् नखः हनेगु खँय् छुं औचित्य खने मदु ।
 अथे जूगुलि भीसं नखः हनाच्वनागु सुंयात स्याःगु बाय् त्याकूगु उप-
 लक्षय् मखु, भी थः हे शक्ति बःलाकेगु उद्देश्यं नखः हनेगु यानाच्वनागु
 खँ सकसिनं थुइकेमाः ।

अनलि स्वन्ति नखः हनेगुची नं भीके उज्वःगु हे भ्रम ब्वलनाच्वंगु
 दु । गुलि विद्वान्तय्सं भीसं थःगु हे मौलिक पहलं हनावयाच्वनागु
 स्वन्तिया म्हपुजाया वारय् भविष्यपुराणयागु प्रमाण धकाः छपुनिपु
 सिलःत न्ह्यव्वयाः म्हपुजा धयागु आत्मपुजा खः धकाः घायेगु याना
 च्वन । वय्कःपिसं थव बिचाः यानामदिउ कि भविष्यपुराण धयागु हिन्दु-
 तय्गु शास्त्र खः । भीथाय् म्हपुजा सु हिन्दु सु बौद्ध सकल नेवाःमात्रं
 हनावयाच्वंगु नखः ख । बरु एकःरा वैदिक पौराणिक धर्मजक माने-
 याना च्वनीपि मनूतय्सं गोबर व बैल पुज्यायेगु बाहेकं म्हपुजा याइ हे
 मखु । यदि म्हपुजा भविष्यपुराणकथं हे हनेगु खःसा ला पुराणपन्थी
 खसतय्सं नं हनेमाःगु खः । उकि सी दु म्हपुजा धयागु नेवाःसंस्कृतिया
 नखः खः ।

भीगु थःगु बिस्कं हे मौलिकता दुगु नखःयात जबर्जस्ति भारतीय
 पुराणलिसे पाय्छि यायेत कुतः यायेगु तःसकं बिचाः मगाःगु खँ जुइ ।
 म्हपुजायात आत्मपूजा घाइपिसं थुइकेमाःगु खँ छु दु धाःसा म्ह धयागु
 शरीर खः, आत्मा मखु । भारतीय आस्तिक दर्शनया सिद्धान्तकथं नं
 आत्मा धयागु शरीरं भित्तम्ह चेतनस्वरूप खः धकाः घयातःगु दु । भीसं

थन म्हपुजा घकाः शारीरिक शक्ति व स्वस्थता प्राप्त यायेया लागि साधना यायेगुया रूपय् हनावयाचवनागु खः । न्हूदँया उपलक्षय् म्हपुजा यानाः जीवनया कार्यक्षेत्रय् न्ह्यचिलावनेगु उद्देश्यं नखः हनेगु थुनिया विशेषता खः । म्हायत आत्मा मानेयाइपिं ला चार्वाकमतयापि नास्तिकत खः । भीसं नास्तिकमत गुल्लें नं माने मयाना । अथे जूगुलि भीसं घय्सुना वयाचवनागु संस्कृतियागु सिद्धान्तया आधारय् भीगु नखःचखः-तय्गु अभिप्राय थुइकेत कुतः यायेमाः ।

भीसं हनावया चवनागु स्वन्तिया लक्ष्मीपूजा दँयागु अन्तिम दिन खः । उकि उगु दिनयात साल तमामया रूपय् भीस हनावया चवनागु खः । दच्छिया कालबिलया ल्याःचाः क्वचायेकाः न्हूगु बालि नं दुकयाः कुथी स्वथनाः थःके दुगु मुक्कं सम्पत्तियात लछिमद्यः भाःपियाः पुज्यायेगु लक्ष्मीपूजायागु आशय खः । वयां कन्हेकुन्हु म्हपूजा घकाः न्हूदँया न्हापांगु दिन भाःपियाः उगु दँया संघर्षमय लँपुइ न्ह्यचिलावने फयेकेत शक्ति प्राप्त यायेया लागि म्हपूजा नखः हनेगु खः । वया नं कन्हेकुन्हु ततांकेहेपिनिगु पाखें नं भितुना कायेया लागि किजापुजा यायेगुया रूपय् नखः हनेगु खः ।

थुकि छगू खँ छु सीदयावः धाःसा मोहनि नखःया स्वन्तिनखःलिसे सत्तिक हे स्वापू दुगु जुयाचवन । मोहनिज्वःछि शक्तिसाधना यानाः खड्गसिद्धि कायेधुनेव थःथितिपिन्थाय् नं नखत्या वनेगु घकाः शक्ति संचय यायेगु ज्या जुइ । थव ज्या स्वन्ति न्ह्यः तक्क हे जुयाचवनी । अले लक्ष्मीपूजाकुन्हु मोहनि द्यःयागु प्रसाद तयाः छायाः लक्ष्मीपूजा याये धुनेव शक्ति संचय यायेगु ज्या पूवनी । वयां कन्हेकुन्हु म्हपूजायागु सगं कयाः शक्तिशाली जुयाः जीवन न्ह्याकेत तयार जुइगु थुगु नखःया अभिप्राय खः । थुज्वःगु रहस्यं जाःगु सांस्कृतिक खँयात गुगुं नं पुराणलिसे पाय्छि यायेत कुतः यायेगु थुनिया मौलिकता स्यायेगु थें जुइ ।

॥

११. नेवाःसंस्कृतिया किंवदन्तीइ दार्शनिक पक्ष

प्राचीन कालनिसं छम्हसिनं मेम्हसित म्हुतुं म्हुतुं कनेगु यानाः न्ह्याना वयाच्वंगु बाख्थिज्याःगु खँ किंवदन्ती धायेगु चलन दु । थुज्वःगु किंवदन्तीत देश, जातिया संस्कृतिलिसे स्वापू तयाः इतिहासथे कनेगु यानातःगु दु । थन नेपालय् च्वंपि नेवाःतय्गु संस्कृतिइ, विशेष यानाः स्वनिगलय् स्वनातःपि थःगु हे पहःयापि छःतय् बारय् यक्व हे थी थी कथंया किंवदन्तीत इलेब्यले कनेगु आःतक्क याना हे च्वंगु दु । गथे वाल्मीकि, व्यास आदि ऋषिमुनिपिसं च्वयाथकूगु रामायण, महाभारत व मेमेगु पुराणय् नारानद्यः, महाद्यः, भगवती छःतय् बारय् अजुचायापुगु लीला जायाच्वंगु यक्व बाख् वित्तृत रूप व्याख्या यानाः च्वयातल, अथे हे थन च्वंपि छःतय् बारय् नं उज्वगु हे अजुचायापुगु बाख्त दु ।

धातथे धायेमाल धाःसा पुराणय् विद्वान् ऋषिमुनिपिसं परिष्कृतगु संस्कृतभासं न्यने यइपुस्से च्वक्क बांलाःगु शैली च्वयातःगु जूगलि मनु-तय्सं पुराणया खँत प्रमाण मानेयानाः दुनुगलनिसं श्रद्धा तयाः न्यनेगु व कनेगु याना च्वन, नाप उकिइ धयातःथे फक्व ज्याखँय् नं दुध्याकेत कुतः यायेगु याना च्वन । वास्तवय् बांलाक्क बिचाः यानाः स्वयेगु खःसा पुराण धयागु नं छगूकथंया वंशावली हे खः नाप उकिया खँ नं किंवदन्ती खः ।

भीथाय् नेपालय् न्ह्याना वयाच्वंगु परम्परागत किंवदन्ती म्हुतुं म्हुतुं जक कनेगु यानावयाच्वंगुलि बाय् छम्हनिम्हय्सिनं सफूया रूपय् पिथना बिउगु दुसां अथे हे म्हुतुं म्हुतुं कनेगु यानातःगु हे स्रोत कयाः गथे न्यनातयागु खः, अथे हे च्वयातःगुलि उकिया खँ पत्याः याये थाकुयाः दन्त्यकथार्थे जुयाच्वन । पुराणय् थें च्वमि थम्हं मिखां खनार्थे, थःनाप

बाखनय् दुथ्याःगु यानाः च्वयामतःगुलि इतिहासलिसे स्वापू दुगु खँ जूसां प्रमाण मानेयाये थाकुया च्वन । वास्तवय् उकिइ नं ततःसकं महत्त्व दुगु खँ दुसुलाच्चंगु दु ।

द्यः मानेयायेगु घयागु दर्शनया खँ खः । संसारय् बिभिन्न धर्म मानेयाना च्वंपिसं थःथःगु धर्मया दर्शनकथं ल्वय्क द्यःत हनेगु याना वयाच्चंगु दु । वैदिक दर्शनया सिद्धान्तकथं नारानद्यः, महाद्यः, भगवती द्यः आदिया बाखं पुराण पुराणय् यक्व विस्तृत रूपं वर्गन यानातःगु दु । बौद्ध दर्शनकथं बुद्ध भगवान्या बारय् यक्व जातक बाखंत पुराणथें हे कनेगु व न्यनेगु याना वयाच्चंगु दु । अथे हे क्रिश्चियन, मुस्मां, जैन आदि धर्मावलम्बीपिसं इमिगु थःथःगु दर्शनकथं ईसु, मुहम्मद, महावीर आदि द्यःतय्गु बाखं तःधगु श्रद्धां कनेगु यानाच्चंगु दु ।

नेपाः देशय् च्वंपि नेवाःतय्सं वैदिक परम्परायापि द्यःत ब बौद्ध दर्शनकथंया भगवान् द्यःतय्त भक्तिपूर्वक पुज्यानाः हनाच्चंसां नं थन थःगु हे पहःया द्यःतय्त मुख्य प्रधानता बियाः हनेगु यानाच्चंगु दु । थनयापि यक्व आजुद्यः अजिमाद्यःत थःगु हे पहःयागु दर्शन न्ह्यब्वयाः मानेयानातःपि द्यःत खः । थ्व खँयात इमिगु बारय् परम्परागत रूपं न्ह्यानावयाच्चंगु किंवदन्तीतय्सं नं प्रमाणित यानाच्चंगु दु । अथे जूगुलि उज्वःगु किंवदन्तीयात सिक्तिकं वंगु खं, नेवाःत मूर्ख याइगु खँ धकाः हेस्याये मजिउ । बरु उकिइ गुज्वःगु रहस्यया खँ दु धकाः दुवालाः सीकेत कुतः यायेमाः ।

किंवदन्ती धायैवं हे उकिइ पत्याः हे मजुइगु व व्यवहारय् वये मफइगु खँ दयाच्चनी । थुकिया मतलब खः किंवदन्तीया फुक्कं धयाथें खंत प्रतीकात्मक जुयाच्चनी । उकियात गथे धयातःगु खः अथे हे जुया वंगु नं खइ धकाः पत्याः यायेसिकं उकिया अर्थ बाय् अभिप्राय छु खः धकाः सीकेत कुतः यायेमाः । गथे पुराणया खँय् वैदिक दर्शनया विद्वान्तय्सं प्रतीकात्मक रूपय् तायेका च्वन । वेदान्तदर्शन कथं ईश्वर छम्ह हे जक सत्य खः, मेगु सकतां संसारनापं व हे ईश्वरया माया जक खः धयाः ईश्वरं हे राम, कृष्ण आदि थीथी अवतार कयाः लीला याना-

चवंगु पुराणय् थाय्थासय् व्याख्या यानातःगु दु । थथे दर्शनया सिद्धान्त थुइकाः उकिया हे मिखां स्वयाःतिनि पुराणया सकतां खँ थुइके फइ । अथे हे भीथाय्थागु किवदन्तीइ नं थनयागु नेवाःसंस्कृतिया नेवाः दर्शनया मिखां स्वयाः अस्वाभाविक व अव्यावहारिकथे तायाचवंगु खँतय्त 'थथे खनी' धकाः सीके फइ ।

भीथाय् स्वनिगलय् परम्परागत रूपं कनेगु यानातःगु लुति, लुमरि, कंग अजिमाद्यःपिनिगु बारय् न्ह्यानावयाचवंगु किवदन्तीया बारय् वाला स्वयेबले छु खनेदु धाःसा नेवाःदर्शनकथं सुं नं मनुखं तान्त्रिक पूजात उकिया अभिप्रायकथं पूर्वकाः साधना यायेफुगु घरिइ मनू छः जुयाः सिद्ध जुइगु खँ पाय्छि जू वः । किवदन्तीकथं लुति, लुमरि, कंग न्हापा इलेव्यले थःछे वनाचवनीपिं तःकेहेत जुयाचवन । पाहांचहे न्हय्न्हु न्ह्यः 'दुरु' च्यां च्यां' धकाः बाजं थानाः पशुपति महाद्यवं च्यान्हु त्वालं पाहां चहे नखःया निमन्त्रणा बियाः ब्वं वःगु जुयाचवन । अले लुमरि व कंग न्हय्न्हु त्वाल इले हे थःछे थ्यंकः वंगु व लुति छम्ह जक च्यान्हु-कुन्हु थ्यंकः वंगु जुयाचवन । थुकिया परिणाम लुमरि व कंग निम्हेसिनं नखः हने खन, लुति छम्हेसिनं धाःसा नखः सिधयेधुंकूगु जुयाः नखः हने मखनाः अपमान चायाः लिहां वयेमाल ।

थन थःछेय् भवय् सःतूगु धयागु तःकेहेतय्त कूटभासं पाहां चहे-यागु महत्त्वपूर्णगु गुप्ततान्त्रिक पूजाय् ब्वति कायेत सुचं बिउगु धाःगु खः । उकि लुमरि व कंग निम्हेसिनं इले हे थ्यंकाः पूजाय् ब्वति काये-खनाः सिद्ध जुयाः अजिमाद्यः जूयावन । लुति छम्ह जक इले थ्यंके मफुगुलिं छखे लात । लिपा बालचहेबले उज्वःगु हे महत्त्वपूर्ण तान्त्रिक पूजा पूर्वकाः लुति नं सिद्ध जुयावन । थुकीया दसुकथं पाहां चहेकुन्हु दय्दस्कं लुमरि व कंग अजिमाद्यःया मन्दिरय् तान्त्रिकविधि तःधंगु जग्य यानाः म्येछयं जग्यय् दुयाः चापुजा यायेगु चलन आःतवकं दनि । अथे हे बालचहेकुन्हु लुति अजिमाद्यःया मन्दिरय् नं उज्वःगु हे तःधंगु जग्य यानाः तान्त्रिकविधि सर्प, चखुं, बखुं जग्यय् दुयाः चापुजा यायेमाः । थुज्वःगु रहस्यात्मक दार्शनिक खँयात कूटभासं भवय् सःतूगु, चीमि धकाः हेस्याःगु आदि खँया रूपय् कनेगु यानाचवन ।

थुगुकथं हे पचलि आजुया बारय् नं किंवदन्ती न्ह्यानावयाचवंगु दु । उगु अनुसारं पचलि आजुं नै छम्ह पिने कलाः तयातःगु दु हँ, अले न्ही न्ही चच्छि नैयाथाय् चवनाः सुथे छः तुइथें च्वन कि सुनां मखंक लँ त्वाःल्हानाः थःगु थासय् लिहां वनीगु हँ । छन्हु नैनं मतिनाय् भुलेयानाः तयातःबले सुथे छः तुइयावःगु होस हे मन्त हँ, अले लिहां वनेत लँ त्वाःल्हाये मजियाः अन हे च्वन हँ ।

थ्व किंवदन्तीया खँ स्वयेबले पचलि घयाम्ह गुलि नैतिकता मदुम्ह गुलि बदमासम्ह व्यक्ति थें खने दु । उज्वःम्ह चरित्र स्यंम्ह व्यक्ति गथे छः जुइ घयागु न्ह्यसः स्वाभाविककथं हे दँ वइ । वास्तवय् थ्व किंवदन्तीया खँ नं कूटभाय् हे खः । पचलि छम्ह तःधंम्ह तान्त्रिक मनू खः । वया कलाः घयातःम्ह नै पचलिलिसे हे तन्त्रमन्त्रय् ब्वतिकया च्वनीम्ह उज्वःम्ह हे तान्त्रिक मिसा खः । निम्हेसिनं नापनापं तान्त्रिक साधना यानाः सिद्ध जुयाः छः जुल घयागु खँ कूटभासं किंवदन्तीया रूपय् उकथं कनेगु यानातल । अथेजुयाः हे आःतक्क नं पचलिमलःकुन्हु पचलिक्वया जात्रा याइबले नै अजिमायागु पात्र नं नापनापं हे जात्रा यायेगु यानातःगु दु ।

थौकन्हे गुलिसिनं पचलि आजुयात पञ्चलिङ्गेश्वर भैरव घयाच्वन, गुलिसिनं धाःसा असिताङ्ग भैरव धकाः घयाच्वन । गनं गनं ला स्वच्छन्द भैरव धकाः नं घयातल । तर न्ह्याम्हेसिनं न्ह्यागु धाःसां पचलिछः न्हापा छम्ह नेवाः मनू खः, नेवाः संस्कृतिया सिद्धान्तकथं सिद्ध जूम्ह नेवाः छः खः घयागु खँयात मखु धायेगु लँ हे मदु ।

भीथाय् थुज्वःगु छःतय् बारय् यक्व तालतालगु किंवदन्ती कनेगु यानातःगु दु । गुलि किंवदन्तीइ ला छःतय्त हे तन्त्रशक्ति ज्वनाः थम्हं घयाथें याकेगु थिज्याःगु आजुचायापुगु खँत दु । स्वर्गया जुजु इन्द्र (यंमाःछः)यात छम्ह गथुं ज्वनाः चिनातःगु, यमराजयात छम्ह तान्त्रिक गुभाःजुं ज्वंगु, महाकाःछःयात शाश्वत बज्र बज्राचार्यजुं अले स्वर्गया कल्पवृक्षयात बिसेत धाःम्ह तान्त्रिक ज्वनाः तयातःगु खँ तःसकं अजुचायापुगु खँ खः । अथे हे ख्वपया छम्ह तान्त्रिक मुनि आचाःजुं भैलः

द्यःयात हे ज्वंगु खँ नं दु । आः थुज्वःगु घटनात धात्थे हे जुयावंगु खःला
बाय् म्वाःमदुगु फसखँ खः घकाः तर्क यानाच्चनेगु स्वयाः थुज्वःगु धापुली
छु रहस्य दु घकाः वाला स्वयेगु हे बांलाः जइ ।

नेवाःसंस्कृतिया सिद्धान्तकथं द्यः घयाम्ह शक्तिरूप जूगुलि यन्त्रय्,
कलशय् बाय् छु नं वस्तुइ आवाहन यानाः प्रतिष्ठापित याये जिउग् खँ
दुगुलि च्वय् नां कयापि द्यःतय् नं तान्त्रिकतय्सं तन्त्रशक्ति आवाहन
यानाः न्ह्यःने तयाः समाज, दे व सकसितं भि याकेया लागि पलिस्था
यानाथकूगु खः घकाः भीसं थुइकेमाः ।

अथे हे थन गां गामय् वनाः न्यंबन धाःसा अन च्वंपि स्थानीय
द्यःतय्गु बारय् नं उज्वःगु हे अजुचायापुगु बाखंत कनाहइ, गुगु बाखं
किंवदन्तीया रूपय् प्राचीनकालंसिं न्ह्यानावयाच्चंगु जुयाच्चनी । ख्वक-
नाय् च्वंम्ह सिखालिद्यः, जलदेया जलद्यः, बोरया नीलवाराही, अथे हे
थेच्चया महालक्ष्मी, क्यपुली च्वंम्ह बाघभैरव आदि आदि नेवाःद्यःतय्
नं बिस्कं हे बाखंत किंवदन्तीया रूपय् दु । थ्व नेपाःदेयागु संस्कृतिया
अनुसन्धान यायेत न्ह्यविलाच्चंपिन्त अध्ययन अनुसन्धानया लागि लं
कयनाः ग्वाहालि यायेफुगु सामग्रीत खः । दार्शनिक दृष्टिकोणं स्वयाः
उकिया रहस्यत थुइकेत कुतः यायां चनेमाः ।



१२. नेवाः संस्कार व इहिपाःया विधि

मनू धयाम्ह वुसानिसे हे छक्कलं फुक्क खँप् पूर्ण जुइमखु । संस्कार यायां तिनि समाजया महत्त्वपूर्ण व्यक्ति जुइ । उकिं धाइ, 'मनू संस्कारं तिनि धार्थ्येयाम्ह मनू जुइ' । बुइसाथं ला वया नां तक्क नं दइमखुनि । समाजय् दुने थ्याकेत नां ला दये हे माल, मखुसा ला व्यक्ति-या परिचय तक्क हे दइमखु, अले उज्वःम्ह परिचय मदुम्हलिसे गथे व्यवहार यायेगु ? मनूतय् नं धयागु म्वात्तलेयात जक मखु, सीधुंकाः तक्क नं फलानाम्ह मनू धकाः लुमकेत माः । उकिं नां छुइगु ज्यायात न्हापांगु संस्कारया रूप्य् मानेयाना तल । नां हे छुइमासेलि लाः लाःथे यानाः लाः लाःगु नां छुइगु हिसि दुगु ज्या जुइमखुलि छगु विवि यानाः थम्हं न्हागु ज्याखँय् नं हनावया च्वनापि आगद्यःत आवाहन यानाः न्ह्यःने तयाः नां छुइगु संस्कार पूर्वकेगु नेवाःसंस्कृतिया थिति जुयाच्वन ।

अनलि काय्मचा जल धाःसा ख्ला कयनकि, म्हाय्मचा जूसा न्याला कयनकि जा नकेगु संस्कार जंक्व यायेगु जुइ । थौं कन्हे वैज्ञानिक-तय्सं अनेकथं अनुसन्धान यानाः मचा प्यला दत धायेव अन्न नकेमाः धयागु खँ सीकाः प्यला दुम्ह मचायात अन्न दुगु वस्तुत नकेमाः धकाः धायेगु यानाच्वंगु दु धाःसा नेवाःसंस्कृतिइ ला गुलिखे न्हापा हे जा नकेगु उपयुक्त ई क्वःछिनाः जंक्व यायेगु परम्परा छचलेगु यानातये धुंकल । थथे जा नकेगु संस्कार यायेबले नं अथे हे द्यःत स्वनाः पुज्यानाः द्यःतय् न्ह्यःने तयाः जंक्व यायेगु ज्या पूर्वकी ।

नां छुइगु (नामकरण) व जा नकेगु (जंक्व) संस्कार मनूया लागि मनू जुयाः म्वायेत आवश्यक जू, उकिं थ्व संस्कार अनिवार्य हे जुयाच्वंगु दु । थ्वयां लिपा काय्मचातय् बुस्त्वा व कय्तापुजा यायेगु,

बज्राचार्यपिनि जूसा बरे छुइगु संस्कार यायेमाः । थुगुपत्ति संस्कार
अबोध मचाया ई पुलावनाः भाय् ल्हाये सयेकाः ज्ञानगुनया खँत सयेके
सीके माःगु अवस्थाय् ध्यन धायेव यायेगु जुइ । थ्व संस्कारं मचा समा-
जय् दुथ्याई । अले सामाजिक न्ह्यागु ज्याखँय् नं फुगुकथं ब्वति कायेगु
अधिकार वया दर्ई ।

अनलि मनू जव पूर्णरूपं ब्वलनेधुंकी थःगु जीवनयात माःगु खँत
नं थम्हं हे पूर्वके फइगु स्थितिइ ध्यनी, अले इहिपाः यायेगु संस्कारया
ई जुइ । थुगुकथं बुसानिसें संस्कारत यायां मनू योग्य, समर्थवान् जुइ ।

नेवाःसंस्कृतिइ इहिपाः यायेगुया थःगु हे बिस्क सिद्धान्त दु । थ्व
नेवाःत सकसिनं थुइकेमाःगु खँ खः ।

इहिपाः न्ह्यागु समाजया मनूतय् नं छुं न छुं विधि यानाः हे
यायेमाः । विधि धाःसा समाजपत्तिकं थीथी दु । अले उज्वःगु विधि
थःथःगु समाजया संस्कृतिया दर्शनकथं अभिप्राय नं दयाचवनी । पश्चिमी
देशय् च्वंनिगु समाजय् इहिपाः यायेगु धयागु यौनतृप्तिया लागि
धयार्थे जुयाचवंगु दु । उंकि इमि इहिपाः यायेन्ह्यः हे मिजं मिसा निम्हे-
सियां फुक्क खँ ब्याकाः तिनि निम्हतिपु जुइ । अथे वासना तृप्तिया
लागि जक निम्हतिपु जूपि जूगुलि इमि चिकीचाधगु खँय् नं तुस्त हे
पारपाचुकेगु ज्या नं जुयावनी ।

अथे हे पुराणया सफूत पुइकाः स्वत धाःसा इहिपाः यायेगु धयागु
सन्तानया लागि धयार्थे खने दु । थम्हं बुइकातयाम्ह काय्मचातिनि
थःसिइबले तरेयाई धयागु बिचाः पुराणय् थाय् थासय् वयनातःगु दु ।
उंकि छुं जुयाः थम्हं ब्याहा याना तयाम्ह कलाःया पाखें सन्तान हे मन्त
बाय् सन्तान दयाः नं म्हाय् जक जुयाः काय् मबुल धाःसा हानं मेम्ह
इहिपाः यानाः हयेगु चलन छ्यलेगु यानाचवन । गुलि गुलि जुजुपिनि
ला सलंसः नं कलाः ब्याहा याना हयातःगु खं पुराणय् उल्लेख जुयाचवंगु
दु । थ्व हे खँ यानाः थौंतक्क नं गुलि समाजय् कलाः धयापि भ्वाति थें
भाःपीगु जुयाचवंगु दनि ।

भीथाय् नेवाःतय्गु इहिपा यायेगु विधिइ बांलाक्क बिचाःयाना

स्वयेबले तःसकं च्छायेबहःगु बांलाःगु अभिप्रायत दुसुलाच्चंगु खनेदया वइ । नेवातय्गु समाजय् कलाःयात अथे भ्वातिर्या रूपय् गुब्ले हे तया- तःगु खनेमदु । परिवारय् दाजु किजा, केहे ततापिलिसे गुलि क्वातुगु स्वापू दयाच्चनी, उलि हे कलाःयात नं छेयागु फुक्क खँय् नं दुथ्याकाः बीमाःगु अधिकारत सकतां बियाः परिवारया छम्ह दुजः यानातइ । अथे जयाः हे जुइ, नेवाःतय्के परिवारप्रति यक्व हे मतिना दुगु खनेदु । धात्थे धायेमाल धाःसा नेवाःतय् नुगः यक्व हे नायू, नुगलय् दया, धर्म, त्यः मत्यःया भावना गाक्क हे दु । नेवाःतय्स हतिपति अपराध घयागु हे याइमखु । भीसं जेलय् बनाः स्वत धाःसा अन सजाय भोमेयानाच्चपि अपराधीतय्गु धलःपतिइ नेवाःतय्गु नां तःसक हे म्हेो खने दइ । थ्व फुक्क नेवाःतय्गु च्छायेबहःगु संस्कृति यानाः हे जूगु खः । अथे जूगुलि बांलाःगु सिद्धान्त दुगु संस्कृतिया समाजय् तःधगु महत्त्व दइ । संस्कृति मद्रुपि मन्त ला साप हे ग्यानापु धाइ, पास्याय् मत्यः धकाः सःसिउपिसं धयाच्चनी ।

नेवाःतय्गु इहिपाःया विधिइ दुवाला स्वयेबले नं छु सी दु धाःसा इहिपाः यायेगुया उद्देश्य यौनतृप्ति व सन्तान प्राप्ति जक मखु । यौन तृप्ति व सन्तान प्राप्ति ला प्राकृतिक देन जूगुलि उकियात गौण उद्देश्य हे धायेमाः । वास्तवय् इहिपाःया मू उद्देश्य नेवाःसंस्कृतिकथं स्वयेबले पारिवारिक जीवन बांलाकेगु खः । परस्पर निगू नाता मक्यपि परिवारया दथुइ स्वापू तयेगु हे इहिपाःया लक्ष्य खः । उकि इहिपाःया ज्या क्वचायेकाः सम्धीतय् खँ लहाइबले 'भीगु निखा छे' छखा जुल' धायेगु चलन जुयावंगु खः । ब्याहा बियाछ्वयेगु ज्यां पारिवारिक जीवन चक्कना वनाच्चनीगु खँ बांलाक हे सी दु । थ्व खँ इहिपाःया विधि नं कयनाच्चंगु दु ।

इहिपाः यायेगु विधिकथं स्वखलःयात ज्याय् ब्वनेगु यानातःगु खने दु । छखलः भीसं दँय्दँसं प्यथयाः मानेयाना तयापि पितृत खः धाःसा निगूगु खलः भीसं न्ह्यागु ज्याखँय् नं हनाबयाच्चनापि आगँद्यः, दिगँद्यः आदि द्यःत जुल । वयां लिपा स्वंगूगु खलः खः धःथिति मन्त ।

थ्व स्वखलःया स्वीकृति कयाः छखा छेँया परिवार जुयाच्चंम्ह म्हाय्-
मचा मेगु परिवारय् भौमचा जुयाः दुहां वनीगुः इहिपा विधिया मूल
अभिप्राय खः । थुकि यानाः भौमचायागु माध्यमं नाता हे मक्यंपि निगू
परिवारया दथुइ क्वातुगु स्वापू दयावनी । तःधक होम यानाः न्हिच्छि
बिक्क विधि याःसां बाय् कलशं छगः जक स्वनाः चिकीचाधक याःसां
इहिपाः विधिया अभिप्राय थ्व हे खः ।

न्हापां पितृतय्त व्वनेगुया लागि गुलिसिनं बय्लि आद्ध यायेगु
धकाः थःगु कुलय् सिनावपि लुमंक्वसित नं कयाः बय्लिया पिण्ड बिइ ।
गुलिसिनं धाःसा सौरसराद्धबलेथें हे पितृतय् नामं प्यं थइ । थथे इहिपाः
यायेत प्यं थयेगुया अर्थ ब्याहा बिया छ्वयेगु ज्याय् पितृतय्त जानकारी
बिया इमिगु पाखें स्वीकृति कायेगु खः । अनलि म्हाय्मचा बिया छ्वइ-
पिनि पाखें म्हाय्मचा पित बिइत ग्वय् सायेकीबले आगंचः, दिग्यः व
मेमेपि थंम्ह मानेयाना तयापि द्यःतय्त म्हाय्मचाया ल्हाति ग्वय् भाग
तयेकी । अले व हे ग्वय्भागय् हे द्यःत आवाहन यानाः पुज्यानाः द्यः
तय्गुपाखें नं स्वीकृति कायेगु ज्या जुइ । अनलि थःथितित सकसित नं
ग्वय् बीकाः इमिगु पाखें नं स्वीकृति काइ । थुलि ज्या सिधल धायेव
सगं बियाः थाय्भु नकाः दक्वले लिपा बौम्हेसिनं ज्वलान्हाय्क व मांम्हे-
सिनं सिन्ह मू क्वसः तयाः ग्वय् काये धुनेव म्हाय्मचा पित बिइ ।

बौम्हेसिनं ज्वलान्हाय्क क्वसः बीगुया अर्थ नं दु, ज्वलान्हाय्क
धयागु जानया प्रतीक खः । गथे भीसं न्हाय्कनय् थःगु खाः स्वयाः
ख्वालय् किनाच्चंगु बांमलाःगु छुं दुसा थुथाय् दु धकाः सीकाः हुयाः
खाः यचुकी, थ्व हे भावं मखुगु बांमलाःगु बानी न्हाय्कनय् खाः
स्वये थें यानाः म्हसीकाः वान्छ्वयेगु अले भिंगु बानी छ्यलेगु जान बीगु
भावय् ज्वलान्हाय्क म्हाय्मचायात क्वसः बीगु जुयाच्चंगु खः । अनलि
मांम्हेसिनं सिन्हःमू क्वसः बीगुया नं अर्थ दु । सिन्हःमूलि दुने तयातःगु
भुइसिन्हः शोभा व सौभाग्यया प्रतीक खः । शोभा धयागु लछिमद्यः
खः । उकि सदां सौभाग्य दुम्ह छेँया लछिमद्यः जुयाः पारिवारिक जीवन
बांलाक हनेगु ज्या यायेगु अधिकार मामं म्हाय्यात बिउगु भावं

सिंहः मू कवसः बीगु खः । भीथाय् लछिमद्यः या किपाय् द्यः या ल्हातय्
सिंहः मू ज्वंका तयेगु चलन दु । थुकि नं सिंहः मू लछिमद्यः या प्रतीक खः
धकाः सी दु ।

थुगुकथं पितृत, द्यः त व थः थिति मन्तय् पाखें म्हाय्मचा मेगु
परिवारया सदस्य जूवनेत अन्मति बिइधुनेव तिति म्हाय्मचा पितबीगु
ज्या जुइ । थुकि म्हाय्मचा विवाहित जुल धकाः जानवारी सकसित
जुइ । पित बीबले नं बाः जु जूम्हेसिया जिम्माय् म्हाय्मचा बियाछ्वइ ।
अनंलि त्वालय् च्वंम्ह गनेद्यः चाः द्दीकाः दुवातय् दनाः सम्धीतय् खँ
ल्हाइबले म्हाय्मचाया बौ नं सम्धीयात 'मचाया द्वविद्वं क्षमा याना
दिसं' धकाः इनाथ याइ, अले बाः जुम्हेसिनं 'थः हे म्हाय् थें यानाः
लहिना तयेः' धकाः बचं बियाः भौमचा छेय् यंकी । थथे बचं बिउग्या
लिच्चः कथं हे जूइमाः, आपाः यानाः नेवाः समाजय् बाः जुम्हेसिनं भौया
विरोधय् फछिफत्तले म्हुतु ल्हनीमखु । थ्व नं भीगु संस्कृतियागु हे देन
घायेमाः ।

म्हाय्मचा बियाछ्वःगु थासय् गुगु विधि याःगु खः अथे हे भौमचा
दुकाइगु छेय् नं इपि हे स्वखलः या पाखें भौमचायात परिवारय् दुथ्याःगु
जानकारी बियाः स्वीकृति कायेगु विधि यायेमाः । न्हासं पितृतय् नामं
बय्लि श्राद्ध याइ, अले भौमचायात ह्वं कीबले आगंद्यः दिग्द्यः व मेमेपि
द्यः तय्त नं अथे हे ग्वय् भाग तयेके बिइ । अनं लिपा थः थितित सक-
सिया नं भौमचायागु ल्हातं ग्वय् कयाः थःगु परिवारय् दुथ्याःगु मान्यता
बिइ । थुलि जूइधुनकि भौमचा परिवारया पूर्णरूपं सदस्य जुयाः सी
बुइबले दुखं बयनीगु व जय्बिलि मालीगु नं जुइ । थथे बिचाः यानाः
स्वयेबले छु स्पष्ट जू वः धाःसा भौमचा घयाम्ह मचाबुइकीम्ह मिसिनथे
जक मखु, छेयाम्ह सम्पूर्ण अविकारप्राप्त परिवारया दुजः खः, नाप
छेयाम्ह लछिमद्यः खः ।


थौकन्हे कोर्तम्यारिज यायेगु चलन धमाधम छयलेगु यानाहयाच्चगु
दु । कानूनया दृष्टि थथे कोर्तम्यारिज यायेगु बांलाःगु हे ज्या जूइफु,
थुकि निम्हतिपुया दथुइ काचाभक आवेशय् बयाः भाःतं कलाःयात बाय्

कलातं भाःतयात त्वःते फइमखु । अथे जूसां नं भीगु समाजया संस्कृति-
कथयागु विधि नं पूवकेगु ज्या जूसा संस्कृतियामु उद्देश्य नं पूवनाः भन्त
वांलाइ ।

यदि थःगु कुलय् सिनाविपि पितृतय् नाम छुं हे मयाःसे त्वःमंका हे
छ्वयेगु खःसा, थःगु कुल परम्परानिसँ हनावयातःपि आगंधः दिग्धः-
तय् नं छुं हे मयाःसे त्वःता हे छ्वयेगु खःसा ला उज्वःम्ह मनूयात
संस्कृति धयागु खंया आवश्यकता हे मन्त, दँय्दँसं यान् वयाच्चंगु मां
बौया श्राद्ध, नखः चखःत हुनेगु आदि छुं हे मयाःसां जिल । अथे मखू,
संस्कृति धयागु माः धयागु जुल धाःसा चिकीचाधक जूसां च्वय् धयागु
विधि पूवके हे माः ।

॥

नेवाः संस्कृति व नेवाः दर्शन



- नां - बलदेव जुजु
थाय् - मखंत्वाः, यै
ज्या - प्राध्यापन (नेपाली विषय)
क्याम्पस - सरस्वती बहुमुखी क्याम्पस,
पकनाज्वः व
काठमाडौं क्याम्पस, मरू
सफू पिथना - सुरेन्द्रमान श्रेष्ठ लिसे जानाः निगू
सफू 'नेपाःया तान्त्रिक यः व
तान्त्रिक पूजा ' व 'कान्तिपुर' पिदने
धुकूगु '

लोक साहित्य परिषदया पाखें पिदने धुकूगु हलंज्वलं

१. नेवाः लोकसाहित्य
२. नेपाः या लोक बाजा
३. लोक साहित्य
४. स्वयम्भूलाल श्रेष्ठया ल्ययाचखँ
५. प्रेमबहादुर कसाःया छुत्वाचा जीवनी
६. लोकम्येया गायक लोकरत्न तुलाधरया जीवनी
७. लोक साहित्यविद् करूणाकर वैद्यया जीवनी
८. पुलांम्ये मुनामि मानदास तुलाधरया जीवनी
९. "इनाप" वाःपौस पिदंगु सांस्कृतिक च्वसु धलः
१०. नेपाल लिपि गुथिया हलंज्वलं धलः
११. लोक साहित्य परिषदया छुत्वाचा खँ
१२. Nepalese Folklore Society
१३. जि व जिया दुने - च्वमि विष्णु 'अल्पज्ञ'
१४. स्वनिगलया ल्वर्हाहति - च्वमि बुद्धार्चाय शाक्य
१५. नेवाः संस्कृति व नेवाः दर्शन - च्वमि बलदेव जुजु
१६. लोकसाहित्य परिषद् छुपुलु संक्षिप्त परिचय
१७. सत्यमोहन जोशीया जीवनी
१८. सत्यमोहन जोशीया च्वखँमुना
(नेवाः व लोक साहित्य)